

Pauro Korĩtio ezektsa bo ziwatahakazo

Wastuhu Korĩtio ezektsa Pauro ziwatahaka naha humo batu siakparawy. Iwatahi ziwatahakazo tahyrikosok-dawy soho humo nisispirikpoko. Deus Pauro tuk zik-napykyrykta hi iwatsahi katsa kino niwatihi Deus soho humo tanymyryky.

¹ Uta Pauro, Sesus Kiristu ykzohota iwa hi Deus niz-ihikik. Ikiatsa Korĩtio ezektsa bo piwataha. Asaktsa Deus tyryktsa, Akaija ezektsa bo niwatihi piwataha. Asahi Sesus harere bo hyĩ nikaranaha. Timoteo humo katsa mymypokzitsirẽtsa mytsy wata atahi katuk ahabo piwatahaka.

² Deus myzo Sesus Kiristu mypehakatsa iwaze sibo mopamykysokoze utakta:

— O myzo Korĩtio ezektsa tysipokzitsihikikta! Sibo tysisapywyky iwaze batu paikpa mytsaty mykaranaha sakurẽtsa mykaranaha — my. Iwa Deus bo ahatsyhyryze mopamykysoko.

Pauro Deus humo tsakurẽta nikara.

³ Katsaktsa Deus bo tihiktsa:

— O Deus myzo ikia zuba tsamysapyrẽta ikia hi mypehakatsa Sesus Kiristuzo. Ikia zuba myhumo tsamypokz-itsiukrẽta, iwatahi myzo babata — tsimaha. ⁴ Atahi sinini tsimykarannahaze mymytsumuẽhĩ. Paikpa mytsaty tsimykarannahaze mymykuwyky. Deus hi:

— Pahatsumuẽhĩ ikiahatsa niwatihi ustsya kytsa sinini mykaranahaze tysitsumuẽhĩnaha iwahi natatsihikik — iwa myhyrinymyrẽtsa Deus hi nimyhyrinymyryky.

⁵ Kiristu mytsyhyryze sinini nikara. Katsa kino niwatihi

Sesus Kiristu humo tsikspirikpokonahaze ihumo sinini tsimykarana. Iwatsa tu sinini tsimykarana zeka atahi mymykuwyky. Iwatsahi ihumo mypunihikrētsa tsimoziknaha.

⁶ Tapara ahabo iktsasoko Deus nymytsumuēhīkī nawa Deus mymysapuhyripyrywyky Kiristu mysapyzēky nihyrikosokda iwatsahi sinini ykarawy bo batu zikaha. Kytsa asaktsa Deus batu siakparawy mymysukyrykynaha. Mymysukyryikiknahaze Deus mymytsumuēhī atahi mymykuwyky ana humo kino ahahyrinymyrētsa.

⁷ Iwaze uta ahasoho humo kaspihikrēta. Ikiahatsa hi:

— Hawa Deus kytsa mysitsumuēhīkīkze iktsa tsimaha, iwatsahi asaktsa Deus batu siakparawy mymysukyrykynahaze Deus mymytsumuēhī, ihumo mypunihikrētsa tsimoziknaha iwahi ustsā kytsa mysitsumuēhīkī niwatihi — tsimaha.

⁸ Katsaktsa Asia eze tuze hawa tshokdaharēna imysapybara ty mybo nikara. Anahi ahabo motsasoko iwaze tsinymyrykynaha. Kytsa nimyitsapyriwykynaha. Sinini tsikykarana. Iwaze mypetu tsikykarana:

— O abahi katsa tsimyokbanahatsa watsa. ⁹ Ustsā kytsa mymybanaha bo — mytsaty tsikykarana. Iwa mytsaty ahabyitsa tu tsikaha. Batu mypunihik. Iwaze myspihikbyitsa tu tsimykarana. Iwaze Deus zuba mymytsumuēhī ana humo hi myhyrinymyrētsa. Ata zuba siakbatsa mynasihyryzikpowy. Iwaze sinini tsimykarana haze batu mytsaty tsimykarana — O katsa mypunihikrētsa tsimaha — iwa batu mypetu mysopyk. Ihumo zuba mypunihikrētsa iwa Deus nimyhyrinymyryky. ¹⁰ Ata pokzi hi kytsa nimbakzykynahaze nymytsumuēhīkī iwatsahi tsikwahnaha. Iwaze katsaktsa:

— O atahi mymytsumuēhīekik iwaze ihumo myspirikporētsa — tsimykarana. ¹¹ Ikiahatsa niwatihi Deus

bo mytsyhyryze tsimypamykysonahaktsa! Mytsyhyryze Deus bo tsimypamykysonahaze Deus mymytsumuēhīkī. Isapyrēnikia ty mybo nyny my. Myhumo tsimypokzit-siukrēta iwaze kytsa ipe:

— O myzo Pauro tuktsa humo niwatihi sihumo tysipokzitsiki, ikia zuba tsamysapyrēta — maha. Iwa kytsa sizubarētsa Deus humo sakurētsa maha.

Pauro ta soho humo meky watu nikara.

¹² Iwaze mypetu mysopyk katsaktsa wasani tsimykaranaha, Deus humo wasani mysopyk. Ikiahatsa humo hi tsimypokzitsiukrētsa iwatsahi mykurētsa. Deus humo ahabo simypokzitsirētsa batu ahabo zuba tsikykaranaha. Deus mymytsumuēhīkī iwatsahi wasani tsimyzurukunaha ana humo hi mykurētsa.

¹³ Iwatsahi ahabo tsiwatahakanahaze ihokdahabara ty tsikykaranaha ipiktsīhibara ty zuba tsikykara naha tsimyspirikponaha. Abaka iwa ape iky h̄y tozeka ja tsimyspirikpo ¹⁴ Ikiahatsa tsikaeni zuba mysoho humo tsinymyrynaha. Uta hi: — Aibani tsinymyrybabanahaze myhumo ahakurētsa — iwa mozihihik. Sesus Kiristu mypehakatsa myziksizoze myhumo ahakurētsa mywatsa ahahumo mykurētsa.

¹⁵⁻¹⁶ Niytahi utakta ahabo mytsaty ikykaraze iknako-zore tsihikik Masedonia bo moparakze:

— O Masedonia bo moparakze Korītiō ezeaktsa bo my-nakozore. Myziksizoze niwatihi Korītiō ezeaktsa bozo my. Nawa petok babaha sibo mynakozore iwatahi mysihyrinymyryze sakurētsa. Sudeja bo my zeka pik-tsumuēhīnaha — iwa mytsaty ikykara. ¹⁷ Anasoho ty ba ziky. Ana humo hi tsipiksapybyikinaha. Ahaokze ka — O Pauro hawa sa mykara batu ihyrinymyry. Batu ispirikpo batu imysapy — tsimaha. Iwa kasoho humo mytsaty tsimykaranaha. ¹⁸ Iwa batu ba my. Deus ba

zikmypsīhikbata, Deus ta wasape zuba mykara. Uta kino niwatihi batu mybarapetu kasopyk. Wasape mykara iwata wasani mykara. Deus ana humo hi tsihyrinymyrēta. Ikiahatsa batu tyso:

— O Pauro hawa motsaso zeka wasani ja mykara — Iwa batu tyso. ¹⁹ Utakta Deus wasania ty Sesus Kiristu soho ahabo iktsasoko. Timoteo, Siras ahatsa katuk Sesus Kiristu Deus tse babata ziknatsasoikiknaha. Hawaha isoho ty tsiktsasonaha wasani ana harere humo hi wasape my. ²⁰ Deus mype:

— Hawa tisapyrēna my pahasapywyky — my. Sesus Kiristu humo hi imysapyrēna ty mybo nyny my. Katsaktsa:

— Hawa haty Deus mybo nitsasoko atsatu wasani mykara. Iharere mybo tsizubarēna. Kiristu humo zuba iharere bo yh̄y mynakara. Iharere baba zuba. Iwa kytsa sizubarētsa bo tsimytsasonaha. Iwatsahi kytsa hi: “O Deus tsamysapyrēta” — mykaranaha. ²¹ Deus hi mymytsumuēh̄iekik. Katsaktsa ikiahatsa kino niwatihi Kiristu tyryktsa tsimoziknaha ana humo hi nimywatawy. ²² Mynaro mynamy humo tsipiwatahanaha iwatsahi kytsa mynamy humo sihyrinymyrētsa. Iwatahi Deus hyrikoso mytuk mynapykyryk Deus tihi: — Asaktsa kahyrytsa — mykara. Deus hyrikoso mytuk mynapykyryk zeka iwaze usa isapyrēnikia ty mybo nyny my.

²³ Deus okze ahabo motsasoko. Iokpyrykytatu batu. Ikiahatsa bo mynakozore zeka pahabetsakak. Pahabet-sakak zeka ahasukatsihikrētsa tsimoziknaha. Iwatahi batu ahabo zuk. ²⁴ Ikiahatsa botu Sesus harere bo hȳy tsimykaranaha. Katsaktsa batu ahapehatsitsa, tsipahatsumuēh̄i tsihikiknaha. Sesus harere bo hȳy tsimykaranaha zeka ihumo ahaspirikporētsa ana humo hi tsipahatsumuēh̄ikīnaha, iwatsahi ahakurētsa tsimoziknaha.

2

¹ Iwaze kapetu kasopyk:

— Tapara Korītio ezeksa kaharere humo batu siaku iwatahi batu mysibetsakzo — iky iwatahi batu ahabo zuk.

² Kaharere humo ahasukatsihikrētsa zeka batu aty tohi pikykuwyky. Ikiahatsa pahasuka tsihikikwyky ikiahatsa zuba tsipikykuwykynaha. ³ Iwatahi batu ahabo zikumu papeu humo iwatahaka, kawataha papeu humo ky zaha-betsakak:

— Ahamysapybyitsa tu tsikykaranaha tσιμοewynahak-tsa! — iky. Ahabo pomoze katy sukatsihikbyri zeka ba zikumu. Tsikykuwykynahaktsa kytsa! Kakurēta zeka ikiahatsa kino niwatihi ahakurētsa tσιμοziknaha hỹ. ⁴ Ahahumo kasukatsihikrēta iwatahi papeu humo ahabo iwatahaka. Ahapokzi ikpuziuku. Ahapokzi paikpa mytsaty mykara. Anapapeu humo iwatahakaze ahasukat-sihik byihuja ahaspirikpowy bete pahahyrinymyryky. Ahahumo kamypokzitsiarēta tu iwahi papeu humo iwatahaka.

Deus mymysapuhyripyrywyky.

⁵ Atakta ahatuk imysapybyita ziknakara ihumo batu kaku. Wastuhu ikiahatsa tuk ihumo ahasukatsihikrētsa. Niwazubaktsa! Isoho botu ahabo iwataha hawa ipe my zeka mymybetsakak iwa botu iwataha. ⁶ Kytsa sizubarētsa ahatuk zibetsakaknaha iwatahi batu zimyizo. Niwazubaktsa.

⁷ Abaka imysapybara ty ziknakara naha ty tsiokzo-hiknaha. Tsitsumuēhīnahaktsa! Atahi tisukatsihikrēta zeka tsiakuwykynahaktsa kytsa! Tisukatsihikrēta tu Deus imysapybara tu ziokzohik. Ikiahatsa kino niwatihi tsok-zonahaktsa anaharere humo tsimyspirikpo zeka ana ty tsitsumuēhīnahaktsa. Iwa zeka iaku byita mozik. ⁸ Ibo

tsipisapywykynahaze iwa ikiahatsa ihumo ahamypokzit-siukrētsa ana humo hi tsihyrinymyrēta. ⁹ Ahabo iwatahaze — Kaharere bo hȳ tsimaha ja. Batu kanyhy — icy. Iwaze iwatahaka. Abaka kahyrinymyrēta. Iwatatuze batu ahabo kozoreze kaharere ty papeu humo iwatahaka ana humo hi tykaranaha.

¹⁰ Atakta imysapybyita ziknakara ihumo batu kaku. Iki-ahatsa imysapybyita tu mykara tsiptokzohiknaha zeka uta kino niwatihi, imysapybara ty nikara ptokzohik. Kiristu okzeka imysapybara ty ptokzohik. Abaka katsa batu mysukatsihik. Wasani my. ¹¹ Satanas mymysapybyiriki iwa botu mytsaty mykara, katsaktsa mysapybyitsa tu tsimykaranaha ana humo kino mymymywyky. Iwa myz-ihik zeka myhyrinymyrētsa iwatsahi batu yhȳ tsimaha.

Pauro Toroade eze paikpa mytsaty nikara.

¹² Toroade bo ikzumuze Deus wasania ty Sesus Kiristu soho Toroade ezektsa bo iktsasoko. Hawa maku ziske-zozekba buruhuwa babatu zipoba anawaha mypehatsa Kiristu zikpeha, Deus wasania ty Toroade ezektsa bo motsaso. Anaeze Deus harere piwaby tsihikiknaha iwaze Deus wasania ty kytsa bo iktsaso. ¹³ Iwa zeka paikpa mytsaty icykara. Titu katsy wata batu tyhobyk Toroade eze. Iwaze Toroade ekze ikparak. Masedonia bo ikukuru anaeze Titu paikpa ikziberiki.

Kiristu izikwyrenikita.

¹⁴ Kytsa niwatorokonahaze aty ipaikanikita ustsya kytsa nisioktyhyryknahatsa. Isukyrytsitsa sipsa humo nisioktyhyryknaha. Ihudikhudikwy bo izumunahaze isukyrytsitsa iapik nisioktyhyryknaha. Sizubarētsa isukyrytsitsa bo iktsa nikaranaha. Anawahi Deus zikwy humo mypuni-hikrētsa tsimoziknaha, ihumo zuba katsaktsa ipaikanikita watsa tsimoziknaha. Iwatsahi kytsa sizubarētsa mybo

2 Korītijs 2:15 7 2 Korītijs 2:17

iktsa mykaranahaze katsaktsa Kiristu tuktsa tihi hỹ ana humo hi sihyrinymyrētsa. Iwatsa nanabyitaba tsimykurunaha. Deus wasania ty tsimytsasokonaha. Wasaniha ty tsimytsasokonahaze jokmorēnikia waha my. Kytsa jokmorēnikia okmore waha iwa Deus mymypeha wasania ty jokmorēnikia waha my nanabyitaba jokmorē. Iwatsahi Deus pe:

— O Deus ikia zuba tsamysapyrēta — tsimaha.

¹⁵ Tubabatu Deus wahoro zubata eze ziknapamykysokonahatsa jokmorēnikia ty zikoroko iwaze zatata tisapyrēna jobo Deus bo nido. Ana zatata waha tsizubarēna ty nu nikaranaha. Iwata katsaktsa Kiristu harere bo zuba hỹ tsimykaranaha ana bo hi kytsa sizubarētsa iktsa mykaranaha. Asaktsa simysapybyitsa nikaranaha sihumo Deus mysiokzohik mybo iktsa maha. Ustsaktsa sinini ykarawy bo mykaranaha asa kino niwatihi mybo iktsa mykaranaha. Iwa sizubarētsa mybo iktsa mykaranaha.

¹⁶ Simysapybyitsa sinini ykarawy bo sisapy, katsaktsa Kiristu tuktsa sihumo zatata nihyrikosokdata hõrõ wata.

Utsa simysapybyikitsa tu nikaranaha iwaze Deus mysiokzohik asa humo kino niwatihi katsa Kiristu tuktsa zatata jokmorēnikia wa iwaze mysiakuwyky. Batu aty tohi Kiristu harere kytsa bo mysihyrinymyryziuku. Atakta Deus zikwy zuba ituk motsasoziuku. ¹⁷ Ata zikwy hi mytuk mynapykyk iwatsahi Deus harere tsimytsasoz-iukunaha. Deus mype niy:

— Wasaniha ty kytsa sizubarētsa bo tytsasokonahaktsa! Kahyrikoso ahatuk mynapykyryk iwa kaharere tsimyt-sasoziunaha — niy. Katsaktsa kytsa humo batu mospihik-bata. Utsa kytsa okyrysaro humo zuba Deus wasania ty motsasokonaha, katsaktsa batu. Kiristu sopyk humo ma

tsimykarana i waze iokzeka tsimytsasokonaha mypub-
araty tsimytsasoziukunaha.

3

Aibaky Deus harere.

¹ Asaktsa pahamyikinaha katsaktsa mahani siwatsaby-
itsa. Asahi:

— Hana bo sa papeu, haneze sa iwatahaha ikiahatsa
wasani ahasopyk — maha. Katsaktsa mysapyrētsa ana
humo hi ahahyrinymyrētsa. Papeu mysoho batu tsimyz-
ihikiknaha. Ikiahatsa ustsaktsa kytsa bo ty moso tsi-
piwatahakanaha batu tsimyzihikik. ² Ikiahatsa mypapeu waha
tsimaha. Kytsa iwatahaha pinymyrykynahaze iwaze ana-
harere humo sihyrinymyrētsa. Kytsa sizubarētsa ahabo
iktsa mykaranahaze asahi:

— O Korītio ezektsa wasani zikzurukunaha. Pauro
wasani nisihyrinymyryky mahani tymyi tsimysapyrēta —
maha. Iwa maha ahamysapybara tsimoewynaha ana bo hi
iktsa mykaranaha ana humo hi kahyrinymyrēta.

³ Ikiahatsa papeu waha tsimaha. Kiristu papeu humo
ziwatahaka nahawa. Utakta karata papeu wata zikpeha
zuba. Atahi iharapuktsaytsikwaka ty iwatahabara. Hara-
hare ukpe humo iwatahabara. Deus hyrikoso ata humo
hi zuba katsaktsa Kiristu sopykyryktsa tsimyzurukunaha,
atahi ispitu mykara. Ata humo hi zuba tsimyyharape pokz-
itsikinaha. Katsaktsa Deus wasania ty ahabo nitsasoko,
ata humo hi zuba Sesus harere bo hyŷ tsimykarana.
Iwatsahi ahamysapyrētsa tsimoziknaha ana ty hi kytsa
sizubarētsa bo karata waha ty.

⁴ Deus okze myspirikporētsa. Kiristu harere bo
hyŷ tsimykarana kine ihumo zuba myspirikporētsa
tsimoziknaha, iwatsahi wasaniha tsimytsasoziukunaha.

⁵ Deus myty tsumuēhī byizeka wasaniha kytsa bo ba

ziktsaso. Deus zikwy humo zuba wasania ty tsimyt-sasokonaha. ⁶ Ata hi tazikwy ty mybo nyny niy. Nanaby-itaba izikwy humo Deus harere wasania ty tsimytsasoziukunaha. Mybarawy ezehtsa bo sizubarētsa ityryktsa mozihihik iwatahi mynamytsumuēhīkī. Deus wasaniha iharere ezytyk my. Anaharere ty mybo nitsasoko. Anaharere humo wasani tsimykaranaha. Tsimyhyrikosokdanaha zeka iharere humo mywahi Deus tuk tsimynapykyknaha. Deus hyrikoso anaharere humo mymyhyrinymyryky. Deus harere, Moises bo nitsasoko ipehawy iwaze kytsa zuba Deus tuk tawahi ba ziknapykyknaha. Kytsa tahaharere humo wasani nizihikiknaha. Batu ba. Taha bo zuba mybarapetu mykaranaha. Tahaharere humo mohyrikosokdanahaze batu tawahi Deus tuk ziknapykyknaha. Deus wasania ty zuba mykara. Ihyrikoso mytuk ana harere mymyhyrinymyryky ana humo hi zuba mysapyrētsa tsimoziknaha.

⁷ Moises Deus harere ibyky mymyhyrinymyry hawa batu mysapy tsimaha. Anaharere haraharetsa siokpez-iurētsa humo ziwatahaka. Deus imysapyrēnikita tu anaharere Moises bo nitsasokoze hawa tisapyrēna natakaha. Iwatahi Isareu tsekokatsa Moises ok bo batu ihtsa zikaha. Tsioksapyrēta niyze iwatsahi kytsa ibo batu ihtsa zikaha. Bykyze iok karipu karipuk ityhỹwy hana bo ja niy. Katsaktsa iharere bo batu hỹ tsimykaranaha zeka tsimyhyrikosokdanahaze Deus tuk mywahi ba ziknapykyknaha. Iharere mymyhyrinymyryky katsaktsa batu mysapy tsimaha. ⁸ Abaka Deus hyrikoso mytuk mynapykyryk anahi wasanikia. Ihyrikoso mytuk mynapykyk atahi isapyrēnikia. ⁹ Deus harere Moises bo nitsasoze anaharere tisapyrēna. Anaharere humo hi Deus mype niy:

— O hawaha ty tsikykaranaha batu imysapy my — nikara. Myhyrikosokdanahaze Deus tuk tahawahi ba

zīknapykyknaha. Deus okzeka batu mysapy anaharere humo hi tisapyrēna. Abaka Deus harere ezytyk, wasania ty aba zubaha anaharere bo yh̄y tsimykarana zeka Deus okzeka mysapyrētsa tsimozīknaha. ¹⁰ Tapara Deus harere Moises bo nitsasokoze tisapyrēna bo iktsa niy. Abaka Deus harere ezytyk wasania ty anaharere hi aba zuba tisapyrēnikia ty. Hawa anaharere mymyhyrinomyryky-nahaze Deus okzeka mysapyrētsa tsimozīknaha iwaze anaharere ezytyk isapyrēnikia ty my. ¹¹ Iharere taparaka tisapyrēna. Deus tihi:

— Anaharere humo yh̄y spyk tsimykarana anahi mozihikik. Bykyze kaharere ezytyk motsasoko anatyhi ahawahi yh̄y tsimykarana haktsa kytsa! — niy. Deus wasania ty zuba isapyhababa motsasoko.

¹² Iwaze katsaktsa mywahi Deus tuk tsinapykyryknaha ana hi taperyky. Deus mymysapywyikik ana humo hi myhyrinomyrētsa. Iwatsahi batu mysikpyby, batu ba Deus wasania ty kytsa sizubarētsa bo tsimyzihikīknaha. ¹³ Katsaktsa batu Moises watsa. Atahi panu ty taty harasuk zīknakara. Isareu ezektsa iok karipu karipuk humo ky ityh̄wytsa hana bo ja iwatsahi ibo batu iktsa niaha.

¹⁴ Isareu ezektsa Moises sopykwy tsikaeni zuba zinomyryknaha. Deus harere humo tsikaeni zuba sihyrinomy. Maku wata atakta panu ty taty harasuk niy. Abaka atsatu. Deus harere sihumo tsihokdaha rēna iwatuze iharere taparaka zinomyrykīknaha anaharere humo batu sihyrinomyry. Kiristu zuba mysitsumuēh̄i iwaze asahi iharere bo hȳy mykarana zeka anaharere mypubara ty pinomyrybanaha. ¹⁵ Abaka Moises sopykwy pinomyrynahaze tsikaeni zuba sihyrinomyrētsa asahi maku watsa panu ty taty harasuk harasuk sisopyk. ¹⁶ Aty zeka:

— Sesus mypehakatsa harere bo hyĩ tsimykara kyze Deus harere ty tsinymyrybaba. Deus papeu humo: “Deus panu ty Moises harek humo ky zihaktahik” — niy. Is-areu ezektsa niwatihi Deus harere bo yhy maha zeka Deus sipanu waha pihaktahik iwa iharere ty pinymyrybanaha. Katsaktsa mysapybyitsa tu tsikykaranaha Deus mymyokzohik. Kyze amy ty panu waha ty hasasuk ty Deus pihaktahik iwaze ihumo myspirikporētsa tsimoziknaha.

¹⁷ Ana waha mypehakatsa Deus hyrikoso kino niwatihi atsatu maha. Ata humo hi meky watu tsimoziknaha iwatsahi Deus tuk mywahi tsimynapykyryknaha. Iharere humo ahapybybyihu ja! Deus okzeka ihumo mysapyrētsa tsimoziknaha. Wasani tsimykaranaha Deus wasaniha humo meky watu tsimoziknaha.

¹⁸ Katsaktsa botu Sesus mypehakatsa harere bo hyĩ tsimykaranaha. Katsaktsa batu kytsa watsa asaktsa panu ty taharek nasihareksukuknaha. Batu ba. Mypehakatsa hyrikoso humo mysapyrētsa tsimoziknaha. Sesus wata tsimoziknaha. Katsaktsa moknywy watsa tsimaha. Kytsa mybo iktsa mahaze Sesus mypehakatsa hyrikoso mytuk pinykynaha moknywy wata. Iwatsahi mysapyrētsa tsimoziknaha pibyyituhukutu Sesus wata mysapytohitsa tsimoziknaha.

4

Deus isapyrēnikia ty mybo nyny my.

¹ Deus mymypsapywyky iwaze tarabaja humo nimypeha. Tubabatu mype niy:

— Nanabyitaba wasania ty myzubarētsa bo paikpa tynatsasokonahaktsa — niy. Iwatsahi mykurētsa. Mytarabajawy humo ba mykubyri zikzumu. ² Hawa batu mysapy kytsa papatu tsipireknaha. Hawa tsimyzurukunaha wasani tsimykaranaha iwatsahi batu mysikpyby.

Deus okzeka wasani tsimykaranaha ana humo hi kytsa sihyrinymyrẽtsa. Hawa batu imysapy tserekbaiknaha. Katsa ba ziksispihikbatanaha, Deus harere humo batu mysimi. Wasaniha ty zuba tsimykaranaha. Deus harere mypubara ty zuba tsimytsasoziukunaha iwaze kytsa mysoho motsasonaha:

— O asaktsa wasani motsasokonaha siharere wasape — mykaranaha.

³ Katsa Deus wasaniha humo tsiktsasoikiknaha. Anaharere kytsa bo tsihokdaharẽna zeka asaktsa sinini ykarawy bo maha, sihumo hi myharere tsihokdaharẽna.

⁴ Asaktsa Satanas hyrikoso sapybara pehatsa sibo mybarapetu mykara. Atakta mybarawy ezektsa Deus wata isopyk mozihikik. Ihumo hi imysapybyikia bo zuba mytsaty mykaranaha. Asahi sihyrizikubyitsa watsa. Unata pyrik mykaranahatsa watsa. Deus wasania ty okoro eze kywa. Hawa mozurukunaha sihyrinymyrẽtsa batu pyik pyik zikaha. Kiristu imysapyrẽnikita myhyrinymyrẽtsa. Deus wasania ty ana ty hi nimyhyrinymyryky. Kiristu Deus wata, wasaniha humo myhyrinymyrẽtsa. Asaktsa sinini ykarawy bo maha ana humo hi batu sihyrinymyry. Deus wasaniha humo batu sihyrinymyry. Sesus harere bo hỹbyri nikaranaha iwatsahi batu sispirikpo. ⁵ Katsaktsa mypetu ba zikaha:

— O myharere bo hyỹ tsimahaktsa! — iwa ba zikaha. Katsa hi:

— O Sesus Kiristu harere bo zuba hyỹ tsimahaktsa kytsa! Ipe: “Ikiahi aba zubata” tsimahaktsa! Iwa pykyhytutaha iharere humo zuba hyỹ tsimykaranaha — tsimaha. Katsa ja. Kiristu mymysapywyikik iwatsahi ihumo tsipahatsumuẽhĩnaha. Ipokzi ahatsyhyryze tarabajaziu tsimykaranaha. Iwa hỹ.

⁶ Isuknihyize iwororo babyize Deus tihi:

— Okoro tu zik — niy. Atsoko okoro yzik niy. Atahi okoroze tu waha isapyrēnikia ty mybo piwatawy. Mymyhyrinomyry. — Kamysapyrēnikita. Kapunihikrēta — anatyhi mymyhyrinomyryky. Kiristu iwata, imysapyrēnikita Deus wata, iwaze isoho humo tsinomyrykynaha. Kiristu humo tsinomyrykynaha iwatsahi Deus humo niwatihi tsinomyrykynaha.

⁷ Katsaktsa Deus wasania ty tsiktsasoikiknaha. Deus pokzitsihity. Katsa mypunihikbyitsa tu Deus zikwy mytuk mynapykyryk, iwatsahi izikwy humo zuba wasania ty tsimynatsasoikiknaha. Katsaktsa morosuk watsa. Morosuk batu isapy batu ihudi iwatahi myboboro iwata tu amy ty ipokzitsiaty morosuk eze pok pok tsimaha. Deus iwatu nimysukni iwatahi kytsa myharere ty piwabykynahaze:

— O asaktsa batu sipunihik iwa motsasokonahaze Deus zikwy humo zuba hỹ — mykaranaha.

⁸ Kytsa mymyknikinahaze Sesus mymytsumuēhĩ. Paikpa mytsaty tsimykaranahaze Sesus humo tsimyspirikpokonaha.

⁹ Mysukyrytsitsa sizubarētsa. Myharereziuwytša kino niwatihi sizubarētsa. Mysukyrytsitsa mymysukyrykiknaha iwatsatu Deus ba zikmyrek.

¹⁰ Pibiyituhukutu mysukyrytsitsa mymyba tsihikiknaha iwaze katsaktsa:

— Sesus sukyrytsitsa zibezēnaha anawahi mymybanaha — tsimaha. Sesus izikwy hi mytuk mynapykyk ana kino kytsa sizubarētsa mymytsatykynaha.

¹¹ Kytsa Sesus harere bo batu hỹ mykaranaha asaktsa mymyba tsihikiknahaze Deus mype:

— Ahasukyrytsitsa pahamyitsapyriwykynaha zeka kahyrikoso ahatuk mynapykyryk ihumo ahapunihikrētsa tsimoziknaha — niy. Iwatsahi kytsa sizubarētsa hi:

— O asaktsa Deus zikwy humo zuba sipunihikrētsa, ihyrikoso situk mynapykyryk — mykaranaha.

¹² Sesus Kiristu harere tsimytsasokonahaze asaktsa Sesus harere bo yhỹ ahabyitsa tu mymyba tsihikiknaha. Ikiahatsa myharere bo yhỹ tsimykaranaha hỹ iwaze tsimhyhyrikosokdanaha zeka Deus tuk ahawahi tsinapykyknaha. Katsa sinini tsimykaranaha iwatsahi ikiahatsa Deus tuk ahawahi tsinapykyryknaha.

¹³ Tubabatu Deus harere papeu humo ziwataha:

— Deus harere humo hyỹ ikykara iwatahi iharere soho iktsasoko — niy. Katsa niwatihi Deus harere bo hyỹ tsimykaranaha iwatsahi iharere kytsa bo tsimytsasokonaha. ¹⁴ Sesus Kiristu nihyrikosokdaze Deus hi zihyrizikpowy. Katsa niwatihi tsimhyhyrikosokdanaha zeka Deus mynamyhyrizikpowy Kiristu wata. Katsaktsa ituk mywahi tsimynapykyknaha. Ikiahatsa kino niwatihi ituk ahawahi tsimynapykyknaha. Deus bo mymyoktyhyryk anaeze mywahi tsimynapykyknaha hỹ. Ana humo hi myhyrinymyrētsa tuze Deus wasania ty tsimytsasoikiknaha.

¹⁵ Katsaktsa Deus harere ahabo tsiktsasokonahaze sinini tsikykaranaha. Ana bo hi iktsa tsikykaranaha. Iwatsahi Deus pahasapywyky iwatsahi sizubarētsa ahatuk Deus tyryktsa moziknaha. Iwaze kytsa sizubarētsa Deus bo nipamykysokonaha:

— O Deus myzo ikia zuba amysapyrēnikita. Mybo tsipisapywyky iwatsahi katsaktsa ahumo ka mykurētsa — tsimykaranaha. Iwaze kytsa sizubarētsa Deus zuba imysapyrēnikita sihyrinymyrētsa hỹ.

Sesus humo sispirikporētsa.

¹⁶ Iwatsahi batu mysukatsihik. Mynury humo batu mypaik tsimytsaikbanaha katsaktsa mypunihikrētsa tsi-moziknaha hỹ. Deus hyrikoso mytukze iwaze Sesus

harere humo zuba tsimyspirikpokonaha. Myzibiyituhukutu izikwy humo meky watu tsimoziknaha.

¹⁷ Asaktsa Sesus harere bo yh̃ ahabyitsa mymyknikinaha. Pahamyitsapyriwykynaha aibani simysapybyitsa tu nikaranaha nepyknaha. Ana humo hi sininispyk tynakaranaha. Bykyzehu Deus mybo pisapywyky. Katsaktsa iwa tsimoziknaha mysapyrētsa h̃. Niwazubaktsa! Ana kino tawahi tsimynapykyknaha h̃. ¹⁸ Iwatsahi hawa ha ty iktsaziu tsimykaranaha ana soho bo mytsaty mytsaty byitaha. Aibani mynapyk mopyk naha bo ka mytsaty mytsaty byitaha. Zikozonahabara bo hi mytsaty tsimykaranaha. Hawa Deus tuk mywahi tsimynapykyrynaha ana soho humo hi mytsaty tsimykaranaha. Amy bo iktsa tsimykaranaha bykyze hana bo ja. Amy bo batu iktsa tsimaha atsatu tawahi mynapykyk. Iwa h̃.

5

¹ Mynury myparik waha. Kaparik eze mopykyrykspyk bykyze mopykbaik iwahatu aba zuba atatu tsimaha, bykyze tsimyhyrikosokdanahaze mynury mobibiba. Tsimyhyrikosokdanahaze mynury wytyk eze tu motare. Deus hi ustsā nury ezytyk mysisukni mytsyhyryze pikymy. Bijoikpe eze mynury ezytyk mozokni anaka mywahoro waha tahawahi mynapykyknaha.

² Abaka mynury ezytyk humo botu myhyrizikbarētsa. Iwatsahi mynury bijoikpe eze tu taperyky. Ana hi tsimyzihikiknaha. ³ Anaeze bijoikpe eze tu mysuk wa tsimynapykyknaha. Mynury ezytyk mysuk wata maha. ⁴ Katsaktsa mybarawy Ezektsa sinini tsimykaranaha. Mytsapyrētsa tsimaha. Kytsa tahaparik eze tu watsa, katsaktsa mynury eze tu tsimaha. Myhyrikosokdabyize mynury ezytyk zuba tsimyzihikiknaha h̃. Deus mynury ezytyk

ty mybo nyny myze mywahi ituk tsimynapykyknaha, ba zikyrikosokdazonaha iwa tsimyzurukunaha.

⁵ Deus hi mekywaha botu mymysapy naha humo hi nimysukni, ihyrikoso mytuk mynapykyryk ana kino moz-ihikik. Iwaze Deus usa nury ezytyk myhumo mokymy mytuk mynapykyryk ana hi tsipinymyryknaha.

⁶ Iwatsahi mypunihikrẽtsa. Mybarawy eze tuze mynury tuk mypehatsa metutu tsimaha. Aibani zuba mywahi ituk tsinapykyryknaha ana humo hi mykurẽtsa.

⁷ Iharere bo hyĩ tsimykaranaha iwatsahi ana hi tapyky. Ana humo hi batu iktsa tsimaha iharere bo hyĩ tsimykaranaha zuba. Sesus sopyk ty tsimyzurukunaha iwatsahi ihumo myspirikporẽtsa tsimoziknaha. ⁸ Iwatsahi mykurẽtsa. Hawa ituk mywahi tsinapykyknaha mysaty tsimykaranahaze hi mykurẽtsa. Iwatsahi mynury tahaerek tsihikik. ⁹ Amy ty aba zubaha Sesus myhumo tsakurẽta mozik. Katsakta mynury suk eze tu myhumo tsakurẽta tsimyzihihiknaha. Katsakta ituk mywahi tsinapykyknahaze myhumo tsakurẽta mozik, iwa tsimyzihihiknaha.

¹⁰ Myzubarẽtsa Kiristu okeryk tsinamykahanaha. Hawa tsikykaranaha humo motsaso. Kiristu simysapyrẽtsa pe my: — Ikiahatsa mybarawy eze tuze tsikzisapykynaha hỹ. Iwaze isapyrẽnikia ty ahahuak ty ahabo nyny — my. Kyze simysapybyitsa pe:

— Ikiahatsa mybarawy eze tuze ahamysapybyitsa tsikykaranaha. Iwa imysapybyiha ty ahabo ahahuak ty nyny my pahasininiwyky — my. Iwa hỹ.

Hawa Deus harereziuwytza tsimoziknaha.

¹¹ Kyze mypehatsa Sesus Kiristu tsazuba nakarata humo myhyrinymyrẽtsa, ihumo ma tsimykaranaha zuba, ipokzi batu mysukatsihik. Atahi myhuak ty mybo

nyny my mytsaty tsimykaranaha. Iwathu itsyhyryze tarabajaziu tsimykaranaha. Deus wasania ty Sesus soho tsimytsasokonaha iwaze kytsa iharere bo hyĩ mykaranaha. Tsimytsasokonahaze wasape mysopyk, wasaniha zuba kytsa mysihyrinomyrykynaha, Deus ana humo kino zinomyry. Ikiahatsa myhumo tsinomyrybanaha. ¹² Ikiahatsa mysoho humo batu mymybetesazo. Ahape batu tysozo. — Katsa tsipahasapywykynaha iwatsahi mybo hyĩ tsimykaranahaktsa! — my. Iwa batu tyso. Ikiahatsa myhumo ahakurētsa ana hi tsimyzihikiknaha. Wastuhu kytsa ahabo zumunaha asaktsa mymysapybyrikinahatsitsa. Siokzeka simysapyrētsa watsa maha amy ty ape bo zuba iktsa sisopyk. Asaktsa mektsatu maha batu sisopyksapy. Hawa tsimyzurukunaha wasani my, ana soho humo hi tsimymybetesanaha.

¹³ Tozeka ja katsaktsa ahaokze ka mytyrykmyitsa watsa. Katsaktsa Sesus pokzi tarabajaziu tsikykaranaha ana humo hi ahaokze ka mytyrykmyitsa mytsaty tsimykaranaha. Zimyinahabyitsa tu zeka tsipahatsumuēhĩnaha ana humo hi tsimyzurukunaha ana kino tsipinomyrykynaha iwaze ahatsyhyryze tarabajaziu tsimykaranaha. ¹⁴ Kiristu myhumo tsimypokzitsiarēta. Anaty kino kytsa sizubarētsa tysitsumuēhĩnaha. Mytsatyziu tsimaha zeka maku estuba zuba mybarawy ezektsa sapyzekenihyrikosokda. Iwatsahi mybarawy ezektsa Sesus tuk tsimyhyrikosokdanaha. ¹⁵ Mysapyzekenihyrikosokda iwatsahi hawa ha tsimyzihikiknaha batu hĩ tsimykaranahaze. Niwazuba mysapyzekenihyrikosokda iwatsahi ana hi mozihikik ana bo hi hyĩ tsimykaranaha. Atahi mysapyzekenihyrikosokda iwatahi ana hi mozihikik ana bo hi hyĩ tsimykaranaha iwa tsimyzurukunaha.

¹⁶ Abaka mybarawy ezektsa watsa batu mytsaty

tsimykaranaha. Mypetu mysopyk:

— O atakta tsimysapyrēta wata — tsimaha.

— O ustakta imysapybyita wata my — iwa mytsaty byitaha! Tapara Kiristu soho nawa mytsaty tsikykaranaha abaka batu. Tsiziakbatanaha zuba zeka Kiristu mymyhyrinymyryky. Sesus Kiristu humo myspirikporētsa tuze kytsa ezytyk watsa tsimoziknaha.

¹⁷ Kiristu tuk tsinapykyknahaze meky watu tsimoziknaha. Deus mymysuknizo tawa iwatsahi ihumo meky watu tsimoziknaha. Hawa tapara tsikzurukunaha batu imysapy abaka mahani. Iwaha hi nepykbaik katsa meky watu tsimoziknaha. ¹⁸ Iwatsahi meky watu tsikyziknaha. Deus humo zuba katsa meky watu tsimoziknaha, Deus hi nimysuknizo Kiristu mysapyzekenihyrikosokda naha humo katsakta meky watu tsimoziknaha. Tubabatu katsakta Deus humo batu mykparawy taparaka ihumo tsikmykyrikinaha. Abaka mahani. Ata humo hi abaka ahaharereziuwu tsimoziknaha iwaze Deus mype niy:

— Utsa kytsa boktsa! — tsimaha. — Kytsa bo tsimytasonaha kahumo hi kaharereziuwu moziknaha, ahaokani byihuja tsimaha — Deus niy.

¹⁹ Kytsa sizubarētsa simysapybyitsa ty nikaranaha ana soho Deus bo ka batu mytsaty nikara. Kytsa simysapybyitsa ty nikaranaha Kiristu sisapyzekenihyrikosokda. Kiristu nihyrikosokdaze simysapybyitsa tu nikaranaha sihuak ziaксе. Iwatsahi ispe tsimaha:

— Sesus harere humo hyĩ tsimykaranaha zeka Deus harereziuwuytsa tsimoziknaha. Kiristu ahasapyzekenihyrikosokda iwaze Deus ahamysapybyitsa tsikykaranaha ihumo zahaokzo — tsimaha. Sesus Kiristu mypehakatsa, iwatsahi iharere kytsa bo tsimytasonaha.

²⁰ Iwatsahi Deus ykzohotsa tsimaha. Deus harere zuba ahabo tsimytasonaha. Katsa hi:

— Deus harereziuwytša tsimoziknaha ana hi mozihikik. Deus myzo ahasopyktsa — tsimaha. Deus hi mybarawy eze tu zeka atsatu ahabo motsasoko, katsaktsa iakzohotsa tsimaha.

²¹ Kiristu batu imyi ana humo hi ahahyrinymyrētsa. Katsa mysapybara ty ana hi Kiristu ziaksehryk niy. Nihyrikosokdaze mysapybara huak ty ziakse niy. Iwaze mysapybyitsa ty tsikykaranaha Deus mymyokzohik abaka hana bo ja. Iwatsahi katsaktsa Kiristu tuk tsimyzurukunaha zeka isopyk watu tsimykaranaha iwatsahi Deus okzeka mysapyrētsa tsimoziknaha. Katsa meky watu tsimoziknaha. Iwa hỹ.

6

¹ Kyze katsaktsa Deus tuk tarabajaziu tsimykaranaha iwaze mypehawy hi:

— Tapara Deus zahasapywyky, isapyrēnikia ty ahabo nyny niy ana humo kino ahaspiriktsokdaha byihuja! Deus harere bo hỹ tahaktsa iwatsahi isapyrēnikia ty arek arek byitaha ja! — tsikaha. ² Deus harere tsiwabytoktonaha! Deus hi:

— Zahasapywy tsihikikze amy kabo tsikzapykykynaha botu iwaby.

Ikiahatsa kabo ahasapybyitsa tsikykaranaha katse humo pahaokzohik.

Iwa zahatsumuēhĩ tsihikik — niy. Abaka Deus pahasapywy tsihikik, abaka pahatsumuēhĩ tsihikik.

³ Wasani tsimyzurukunaha iwatsahi kytsa Sesus harere bo hỹ mozihikiknaha. Hawa batu imysapy tsimykaranaha zeka kytsa tihi:

— O Deus tsumuēhĩtsitsa batu wasani mykaranaha iwatsahi katsaktsa Sesus harere bo batu hỹ zikaha —

mykaranaha. Nawa kytsa mysoho ba ziktsasonaha, batu zikaha, wasani tsimykarana.

⁴ Katsa hi Deus tsumuẽhĩtsitsa tsimaha, ana kino ustsas bo tawatawykynaha. Asaktsa Sesus harere bo hyĩ ahabyitsa tu mymyknikinaha. Katsaktsa sihumo mykubyrisorokrẽtsa. Mymysukyryikiknaha, mykubyri-tywy kino niwatihi iwatsa tu mykubyrisorokrẽtsa. ⁵ Asahi nymykikinaha nymyhuruknaha. Katsa tsiknazuzuknahaze nymysapybyrikinaha. Nymyhudizukunaha. Deus humo tsizubarẽna ty tarabaja ba zikpyk, myrapa tsiykyknaha, mytutsa tsiykyknaha iwa tsikzurukunaha.

⁶ Iwaze ustsas kytsa mysoho zinymyrykynaha. Katsaktsa Deus tsumuẽhĩtsitsa sihyrinymyrẽtsa. Wasani tsimyzurukunaha ana humo hi katsa Deus tsumuẽhĩtsa zinymyrykynaha. Mysapyrẽtsa. Deus harere humo myhyrinymyrẽtsa iwatsahi iharere tsimytsasozuikunaha. Mykubyrisorokrẽtsa. Mysopykziurẽtsa. Deus hyrikoso mytuk mynapykyryk iwatsahi kytsa tsiksisapywykynaha. Tsiksipehapokzitsikinaha. ⁷ Deus harere zuba tsimytsasozuikunaha, Deus zikwy mytuk mynapykyryk. Wasani tsimyzurukunahatsa hi ana humo mybototsa watsa tsimaha. Mybototsa ty papyk papyk tsimaha mymybetesawy naha ziktsa watsa namybetesakanaha. Kytsa Sesus bo hyĩ ahabyitsa tu myhumo natahakyrikinaha. Mysapyrẽtsa tu Deus hyrikoso humo iwaze batu myharerewabymybara batu zikaha. ⁸ Wastuhu kytsa mysoho humo siharereziurẽtsa. Ustsaktsa batu, mysoho humo batu siharereziurẽtsa. Mektsatu kytsa tihĩ:

— O Pauro tuktsa simysapyrẽtsa — maha. Ustsas:

— O Pauro tuktsa batu mykparawy — maha. Iwa my. Katsaktsa wasani tsimykarana haze batu isty myi, amy ty wasanikia ty zuba tsimytsasokonaha. Iwaze kytsa

mysoho — asaktsa sispihikbatakatsa — maha. ⁹ Kytsa nyhybyitsa watsa sisopyk. Utsaktsa mynyhytsa tihi hỹ maha. Wastuhu kytsa:

— Pauro tuktsa botu niakbabanaha — maha. Katsaktsa myspitu tsimaha. Kytsa mymyzuhunahaze ba zikmybanaha.

¹⁰ Kytsa ziknamykubyikinaha iwatsatu Deus humo mykurētsa tsimynapykyknaha. Kytsa tihi — asaktsa sinamybyitsa — maha. Katsaktsa Deus wasania ty tsimytsasokonahaze isapyrēnikia ty kytsa bo nyny tsimykaranaha, ikiahatsa niwatihiktsa ana harere humo hi sinamyrētsa watsa moziknaha. Kytsa okzeka mynamybyitsa watsa iwatsatu Deus okze mynamyrētsa watsa imysapyrēnikia ty mybo nyny niy.

¹¹ — O Korītio ezektsa myharereziuwysitsa ahahumo tsimypokzitsiukrētsa. Myharere ahabo batu iokdaha myharere mypubara. Hawa mytsaty tsimykaranaha ana kino ahabo tsimytsasokonaha ikiahatsa mykparawysa.

¹² Tsipahasapywykynaha ana hi tsimyzihikiknaha. Ikiahatsa ja. Myhumo hỹbyri tsimykaranaha.

¹³ Ahabo tsimytsasokonahaze myhyrytsa pe maha wa tsinakaranaha. Ikiahatsa mybo aha humo kyty tsiwatawynaha. Myhumo ahakyribyihu ja — tsimaha.

Pauro Korītio ezektsa bo nisisukpe.

¹⁴ Ikiahatsa kytsa Sesus harere bo hỹ ahabysa tu ka pão pão byitaha. Kytsa simysapybyitsa mykaranahatsa ba situk mynapykyknaha. Aty zeka okoroze pitabaka taske humo tsihyrinymyrēta. Aty zeka unata eze pitabaka pyrik pyrik mykara iwatsahi ituktsa batu zikaha. Asaktsa ahatuktsabyitsa. Iwatatu ikiahatsa Sesus tuktsa Sesus harere bo hỹ zikahabyitsa tu ba situk tsinapykyryknaha. Batu ahamykpyriziu.

¹⁵ Kiristu Satanas ahatsa batu harape tuk zikaha. Iwatsa Sesus tuktsa Satanas tuktsa meky watu maha. Hawa Sesus tuktsa mytsaty mykaranaha hawa Satanas tuktsa mytsaty mykaranaha meky watu mykaranaha. Batu atsatu mytsaty zikaha. Iwatsahi batu simykpyriziu. Iwa hỹ. ¹⁶ Deus wahoro zubata deusbyitsa wahoro mekywaha tu maha. Katsaktsa Sesus harere bo hyỹ tsimykaranahaze Deus wahoro wata tsimaha. Deus hyrikoso mytuk mynapykyryk iwaze Deus hi:

— Utakta situk mynapykyryk. Kape: “O Deus ikia zuba myzo” maha.

Ikiahatsa hi katyryktsa ispe my — niy.

¹⁷ Iwatsahi mypehatsa tihi niy:

— Sispirikpobyitsa ty ka arekiktahaktsa!

Hawa mysopyksapy byizeka tahaerekiknahaktsa!
Imysapybara tsiperekiknaha zeka kabo pahaoktyhyryk hỹ.

¹⁸ Utahi ahazo mozik.

Ikiahatsa kahyrytsa tsimoziknaha.

Kahyrytsa kahyryza ahape my — niy.

Iwa Deus nikara atahi izikwyrēnikita my ba hawa tohi zikzukninaha.

7

¹ — O myharereziuwyttsa ahahumo kamypokzitsiarēta. Deus mymysapywyky isapyrēnikia mybo pinyny tsihikik my ana tyhi Deus mybo motsasoko. Iwatsahi hawa ha ty mysapybyitsa tsimykaranaha ty ka tymoewytahaktsa! Isopyksapybara humo mytsaty mytsaty byitaha! Iwa tsimykaranaha zeka Deus hi mysapyrētsa mymysukni. Iwaze hawa ha ty Deus batu iakparawy ipokzi batu tsimykaranaha. Iwaze isoho zuba mytsaty tsimykaranaha — my.

Pauro tsakurēta mopykyryk.

² O kytsa myhumo ahamypokzitsihuktsa! Katsaktsa tsipahapokzitsikinaha hỹ. Katsaktsa batu aty tohi tymyi. Katsaktsa batu aty tohi humo myharerewabytsihik. Katsaktsa ahatukze batu mybarapetu aha. Mynamy humo zuba batu mybarapetu tsikykaranaha, aha humo wasani mysopyk.

³ Ana tyhi batu tyso iwaha ty ahamysapybyi humo. — O ikiahatsa kaokzeka batu ahamysapy — my. Ana ty hi batu mysopyk. Botu ahabo iktsaso hawa ahahumo mypokzitsirētsa, mywahi ahahumo mypokzitsirētsa tsimaha. Abaka ahahumo mypokzitsirētsa, tsimyhirikosokdana-haze kino iwa hỹ ahahumo mypokzitsirētsa. ⁴ Utakta ahahumo kakurēta mspihikbatabyitsa tu tsimaha. Utsa kytsa bo pahaharereziuwiky. Kytsa mymysininiwykynahaze ahasoho bo mytsaty tsimykaranaha, iwaze tsimyzikuwynaha. Ahahumo hi kakurēta.

⁵ Masedonia bo tsikumunahaze batu myty byry. Kytsa sizubarētsa nahape myijakanaha ana soho meky watu tsihokdaharēna. Mypybyrētsa tsikykaranaha. ⁶ Deus siakubyitsa mysiakuwyky mozihikik iwa mybo niy. Titu zumuze Deus ihumo mymykuwyky. ⁷ Zumuze atahi:

— O Korītio ezektsa kahumo simypokzitsiukrētsa hỹ. “O Pauro humo katsa myhyrizikbarētsa mybo mynakozore tawata” nikaranaha. Atakta imysapybara ty nikara, isoho humo batu siaku, ihumo sisukatsihikrētsa mykaranaha “O Pauro pehawy wasani” nikaranaha — niy. Iwa Titu mybo nipamykysoko. Hawa Korītio ezektsa pikbetesa tsihikiknaha iwatahi kakurēta babata mopykyryk. Iwa Deus nimykuwyky.

⁸ Iwaze kapapeu humo zahabetsakak ahaku byitsa tu tsikykyknahatsa tu iwaze ahasukatsihikrētsa tsikaha. Ana kino ziwatahaka wasani niy. Kapapeu humo batu ahaku wasani niy. Tapara kapetu ikykara:

— Anapapeu iwatahaka Korītiō ezeḡtsa iksibetsakak wasani ja — iwa kapetu kasopyk. ⁹ Kawatahaha humo ahasukatsihikrētsa ana humo hi wasani my. Kawatahaha tsinymyrynahaze ahamysapybyitsa tsikykaranaha tsimoewy tsihikiknaha ana humo hi kakurēta. Deus hi zahaokzohik ahamysapybyitsa tsikykaranaha humo batu ahaku tsikyziknaha abaka ahamysapybyitsa tsimykaranaha. Tsimoewybaiknaha. Iwatahi kawatahaha ty ahabo ikzinynyre wasani, abaka kaharere humo batu ahamyi iwatahi ahasapywyky.

¹⁰ Jokboha ahakubyitsa tu tsikykaranaha iwatsahi mysapybyitsa tsikykaranaha tamoewybaik, iwaze Deus zikwy humo meky watu tsimoziknaha. Ahasapyrētsa tsimoziknaha. Ahakurētsa. Asaktsa Deus humo batu siakparawy asahi pisuka tsihiknaha zeka simysapybyitsa nikaranaha ba ziksimoewynaha. Myhyrikosokdanahaze Deus tuk ba tahawahi ziknapykyryknaha asaktsa sinini ykarawy bo maha. ¹¹ Ahasukatsihikrētsa tsikykaranaha. Ahakubyrize Deus isapyrēnikia ty ahabo nyny niy. Ana bohi mytsaty tahaktsa kytsa! Iwatsahi kytsa wasani tsimoziknaha. Mybo batu ahaharere ty harapubetehe tsikykaranaha. Kawatahaha humo nepykba tsinymyryknahaze tsikpybynaha! Atakta ahatuk imysapybyita tu nikara ihumo tsikahakyrikinaha iwaze ikiahatsa ipe: nabo pāoty tsikaha. Iwaze ahatuk zuba tsikpamykysokonaha:

— Hawa ja tsikykaranaha wasani ja. Tybyi zuba tsimaha ja. Pauro mytuk tsimyzihikiknaha iwa mymytsumuēhī — tsimykaranaha. Hawa tsikykaranaha wasani. Kytsa sizubarētsa ahasoho humo sispirikporētsa maha nikaranaha.

¹² Iwatahi tubabatu ahabo iwatahaka. Atakta ahatuk imysapybyita tu nikara awatu mahakta iwa ahabo ity wataha. Atakta sinini niyze zikyrinymyryky ana humo

hi ahabo batu ity wataha. Deus okzeka kaharere bo hỹ tsimykaranaha, kytsa bo mypubara ty mykaranaha ana hi iwatahaka hawa myhumo ahamypokzitsirētsa, ana humo hi ahabo iwatahaka ana hi tsinymyrynaha. ¹³ Iwatsahi katsa mykurētsa h̃y.

Abaka myhyrinymyrētsa. Ikiahatsa myhumo tsimypokzitsirētsa ana hi tsinymyrykynaha. Titu mybo zumuze atahi:

— O Korītio ezektsa zikpokzitsikinaha — niy. Wasaniha humo mykurētsa. ¹⁴ Tubabatu Titu ahabo asiba niparakze uta ipe iky:

— O Korītio ezektsa simysapyrētsa ahumo wasani maha papokzitsikinaha h̃y — iky. Kaharere wasani my. Ihumo tsimypokzitsikinaha ahasoho pe batu mybarapetu ikykara. Iwa ha ty wasani tsikykarana. ¹⁵ Titu hi:

— O Korītio ezektsa kaharere bo hỹ nikaranaha. Zik-tsumuēhikīnaha kahumo simyharerewabyrētsa — niy. Iwatahi ahahumo tsimypokzitsiarēta. ¹⁶ — O kytsa ahahumo kakurēta h̃y, hawa tsimytsasokonaha atsatu tsimykaranaha iwaze ahahumo kakurēta h̃y — my.

8

Sesus tuktsa simykubiyhurētsa niyziknaha.

¹ O katukytsa Masedonia ezektsa asaktsa izumubanhaze Deus harere piwabynaha Deus nisisapywyky iwatsahi simykubiyhurētsa niyziknaha, ana soho hi tsinymryrynahaktsa. ² Sinini nikaranaha. Sinamybyitsa nikaranaha. Iwatsatu ustsā sinamybyitsa bo nynytohi nikaranaha. Sibō nyny nikaranahaze sakurētsa. ³ Ana humo hi kahyrinymyrēta. Ustsā kytsa bo zibiakaknaha. Uta batu isty peha nyny mykaranaha asa tu nyny nikaranaha. ⁴ Asahi:

— O mynamy ty myokyrasaro ty iwa ahabo nyny tsimykaranaha. Sudeja ezektsa Sesus harere bo hyŷ mykaranaha asa bo hi nyny tsimykaranaha. Myokyrasaro ty mytsyhyryze wabehyryk tsimaha — nikaranaha. Iwa tsizubarēna nitsasokonaha. ⁵Katsaktsa mypetu mysopyk:

— O asaktsa tsikaeni zuba nyny mykaranaha — mytsaty ahabyitsa tsikykaranaha. Tsizubarēna nyny nikaranaha. Taparaka tawaha ty Deus bo nyny niaha iharere bo zuba hyŷ nizihikiknaha, iwaze myharere bo kino niwatihi hyŷ nikaranaha. ⁶Ana ty kino katsaktsa Titu pe:

— O Korītio bo tynakozorekta — tsikaha. Titu zahatsumuēhī. Ahape niy:

— Ahaokyrasaro ty sinamybyitsa bo nyny tahaktsa! Iwa tsipisapywykynaha — niy. — Iwaze Korītio ezektsa bo tsimy. Tysiakuwykyktsa — iky. Hyŷ niy.

⁷Ikiahatsa ahanamyrētsa watsa tsinakaranaha. Sesus humo ahaspirikporētsa hŷ. Deus wasania ty tsimytsasoz-iukunaha. Tsahyrinymyrētsa babatsa tsimaha. Utsa tsimysitsumuēhīkīnaha hŷ. Myhumo ahamypokzitsirētsa tsimaha. Iwaze uta ahape my: — Sinamybyitsa bo ahanamy ty nyny tahaktsa! Utsa kytsa sinamybyitsa bo nyny maha, ikiahatsa hi ahanamy tsizubarēna ty nyny tahaktsa kytsa sinamybyitsa bo! — my.

⁸Ahabo motsasoko kahumo batu ahaty ykzo. Batu kaharere humo ahanamy ty nyny tsimaha. Masedonia ezektsa tsizubarēna ty nyny niaha. — Ikiahatsa tihi! — iwa tsimykaranaha zeka myhumo ahamypokzitsirētsa babatsa tsipiwatawykynaha. ⁹Ikiahatsa botu mypehakatsa Sesus Kiristu soho bo mytsatyziu tahaktsa! Myhumo tsimypokzitsiarēta hi atakta Deus tuk bijoikpe eze tuze tsinamyrēta hŷ. Iwatatuze mybarawy bo izumuze inamybyita niyzik mypokzihi ninamybyiri. Iwaze hi katsa ihumo mykurētsa tsimoziknaha, sinamyrētsa watsa.

¹⁰ Kapehawy ty ahabo my. Jatukta omoro eze ikiahatsa tihi:

— O sinamybyitsa tsyhyryze myokyrysaro tsiperykynahaktsa! — ahatuk tsikpamykysokonaha. Taparaka ikiahatsa tsikzihikiknaha iwaze atsatu tsikykaranaha Sudeja ezektsa tsiksitsumuēhīnaha. ¹¹ Iwatsahi tybyizubatahaktsa! Sinamybyitsa tsysitsumuēhīzonahaktsa kytsa! Batu mytsaty tsimaha:

— O myokyrysaro ty tsizubarēna mozik zeka iwaze sinamybyitsa tsyhyryze taperyky — iwa ba mytsaty tsimaha. Abaka ahaokyrysaro ty tsimaha ana kino sinamybyitsa bo nyny tsimaha.

¹² Ahakurētsaktsa! Katsaktsa myokyrysaro ty nyny tsimyzihikiknaha zeka ana kino Deus okze wasani my. Myokyrysaro tsikaeni zuba tsimaha zeka iwaze ustsā bo tsipinynynaha zeka ana kino Deus okzeka wasani my. Iwatahi aty nyny myzeka Deus hyỹ my. Mybaze byizeka Deus batu mype ziky:

— Ustsā bo tsipinyny tsihikiknaha zeka ana kino kaokze wasani — my.

¹³⁻¹⁴ Ahanamybyitsa tsmoziknaha zeka batu mozihikik. Abaka ikiahatsa ahanamy tsizubarēna tsikaha asaktsa batu sinamy. Iwatsahi ahanamy sibo tsibiaknaha zeka wasani. Bykyzehu tozeka ja ikiahatsa ahanamybyitsa tsmoziknaha iwaze ahabo pibiakaknaha. Iwaze batu aty tohi inamybyita. Batu aty tohi inamyrēta. Iki-ahatsa aharape watu tsmoziknaha ahatuk tsipibiakaknaha. ¹⁵ Deus harere papeu humo iwataha:

— Aty disahawy tsizubarēna zeka ba are ziky.

Aty zeka disahawy jokboha zuba atakta batu irapa — niy.

Iwa Deus watahaha nitsaso kytsa soho asahi pibiakaknaha.

Titu iwaze ituktsa ahatsa hawa mykaranaha.

¹⁶ Iwaze Titu kawata my. Atahi niwatihi pahatsumuēhī tsihikik iwaze utakta Deus pe:

— O myzo ikia zuba amysapyrēnikita. Ikie humo Titu Korītiō ezektsa mysitsumuēhī tsihikik iwatahi kakurēta — mykara. ¹⁷ Titu kaharere bo piwabyziuku hawa ha ty ibo nizapykyky ana hi hȳ ny. Atahi:

— Utakta Korītiō ezektsa bo mynakozore tsihikik — ny. ¹⁸ Ituk hi usta mytuky tapehaka nanabyitaba. Deus wasania ty natsasokoro myzubaha bo. Sesus tuktsa sizubarētsa isoho tihī:

— O ata hi tsiwaby tsihikiknaha — maha. ¹⁹ Sesus tuktsa mytukta tu ziwatawynaha, Serusarēhe bo tsikukurunahaze mytukta ziwatawynaha. Ahaokyrysaro ty wabehyryk tsimaha ana kino sinamybyitsa bo nyny tsimahaze:

— Katsa ahahumo mypokzitsirētsa — sihyrinymyrētsa. Asaktsa Deus pe niaha:

— O Deus myzo ikia zuba tsamysapyrēta — maha. Ahanamy ty sibō tsipibiakaknaha humo tynamypehapokzitsikinaha iwatsahi Deus bo inapamykysokonaha.

²⁰ Okyrysaro tsizubarēna Serusarēhe ezektsa bo wabehyryk tsimaha. Hana wa sinamybyitsa bo okyrysaro ty nyny nyny tsimaha ana hi wasani tsimykaranaha, iwa zeka hawa okyrysaro ty kytsa bo nyny tsimaha pykyhytu tsimaha. ²¹ Hawa Deus okzeka wasaniha bo zuba mytsaty tsimyzihihikiknaha. Deus okze ka wasani tsimykaranaha ikiahatsa okze kino niwatihi wasani tsimyzihihikiknaha.

²² Iwatsahi usta Sesus tukta katsy piakzohik. Tapara hawa tsihokdahaŕēna nikaraze kytsa nisitsumuēhikī ana ty hi myhyrinymyrētsa. Ahahumo tspirikorēta iwaze tihī:

— O Korītio ezektsa okyrysaro ty sinamybyitsa bo nyny maha ana humo hi kahyrinymyrēta — mykara. Ahabo mynakozore tsihikik. Iwa hỹ. Kytsa harakykbyitsa ahabo mysiakzoko.

²³ Titu katukta pahatsumuēhīkī. Utsa Sesus tuktsa petoktsa ituk mokurunaha. Sesus harere bo hyỹ sisopyktsa asahi siwatawyhytsa niaha. Kiristu bo mosakibazikiknaha. ²⁴ Kyze ahabo mozumunahaze tysipokzitsikinahaktsa kytsa! Iwatsahi Sesus tuktsa sizubarētsa Korītio ezektsa soho humo maha:

— O asaktsa kytsa humo mysipokzitsikinaha hỹ — mykaranaha. Iwaze myharere ahasoho wasani my sihyrinymyrētsa.

9

Korītio ezektsa siokyrysaro ty Sesus tuktsa Sudeja ezektsa bo nyny niaha.

¹ Iwaze asaktsa Sudeja ezektsa Deus tuktsa tsimysitsumuēhī tsihikiknaha kahyrinymyrēta iwatahi batu ahabo papeu humo piwataha. ² Utakta botu Masedonia ezektsa pe:

— Sesus tuktsa Keresia ezektsa sinamybyitsa bo mysitsumuēhī tsihikiknaha jatukta niytyktseheze nisitsumuēhī tsihikiknaha — iky. Ana hi ziwabynahaze asahi:

— Katsaktsa niwatihi sinamybyitsa bo tahatsumuēhī tsihikiknaha — niaha. ³ Aba uta mytukytsa ahabo mysiakzoko. Ispe iky:

— O Korītio ezektsa botu tahaokyrysaro izikyppykynaha. Ana hi mybo nyny mahaze iwaze katsaktsa siokyrysaro tabykyk sinamybyitsa bo nyny tsimaha — iky. Anawahi iksasoikik. Ahaokyrysaro ty koro ahabyizeka kaharere ba wasani my, iwatahi katukytsa

ahabo mysiakzoko, iwaze hawa ahabo botu iktsaso atsatu tsimykaranaha.

⁴ Masedonia ezektsa katuk maha zeka ahaokyrysaro ty koro habyizeka ahahumo mysikpybyrētsa. Ikiahatsa kino niwatihi ahaokyrysarobyi humo ahasikpybyrētsa. Kaharere ahasoho humo siokzeka batu wasani ana humo hi kasikpybyrēta. ⁵ Iwatahi katukytsa kaharaze mysiakzo. Pahatsumuēhīnaha. Hawa ahaokyrysaro ty koro tsimaha zeka pahatsumuēhīkīnaha. Hawa botu tsiktsasonaha anaharere bo yh̄y tsimaha ana kino pahatsumuēhīnaha. Bykyze mozumuze mokymyba iwaze ustsā kytsa tihi:

— O Korītio ezektsa tahaokyrysaro ty nyny niaha. Ba ustsā harere humo nyny niaha. Asaktsa tahaokyrysaro ty pinyny tsihikiknaha h̄y — mykaranaha.

⁶ Aty jokboha zuba mysiparik zeka jokboha zuba mysizozik. Aty mysiparik tohi zeka sizubarēna mysizozik. Iwa hawa nyny tsimykaranaha wata atsatu my. Ana bo hi mytsatyziutahaktsa kytsa! ⁷ Aty tapetu isopyk zeka:

— Kaokyrysaro ty ustsā kytsa bo ba nyny ziky — my. Iwa zeka nyny byity. Usta ape my zeka: — Aokyrysaro ty kytsa bo nynyty — my. Iwa zeka nyny byity. Iki-ahatsa ahaokyrysaro ty ustsā bo tsipinyny tsihikiknaha zeka iwaze ahaokyrysaro ty nyny ty. Ahakurētsa nyny tsimaha. Iwa nyny tsimykaranaha zeka Deus okzeka wasani tsimykaranaha. Deus ahahumo tsimypokzitsiarēta h̄y. ⁸ Deus hi isapyrēnikia ty ahabo nyny mykara. Deus tanamy ty tsizubarēna ahabo nyny my. Iwaze ikiahatsa hi ustsā kytsa bo ahanamy ty nyny tsimaha. Ahanamyrētsa ikiahatsahi:

— O mynamy ty tabiak tsihikiknaha — tsimykaranaha. Iwaze Deus humo ba ziknamybyi tsimaha. ⁹ Iwa Deus papeu humo ziwataha:

— Aty tsimysapyrēta tu zeka tanamy ty sinamybyitsa bo nyny mynakara.

Iwaze kytsa isoho “atakta tsimykubiyihurēta” mynakaranaha

iwa Deus harere papeu humo ziwatahaka.

¹⁰ Deus hi riktsa ty mybo nyny my. Riktsa jokboha tsimysipariknahaze puētsik zuba tsimysizoziknaha. Tsimysipariknahaze sizubarētsa tsimysizoziknaha iwa Deus mydisahawy ty mybo nyny mynakara. Nawa Deus isapyrēnikia ty mybo nyny mykara. Anawahi ahanamy ty tsizubarēna ustsā kytsa bo nyny tsimaha. Deus humo tsizubarēna kytsa bo nyny tsimaha! Iwaze ahahyryzikporētsa tsimoziknaha. ¹¹ Deus ahahumo tsimypokzitsiukrēta iwaze ustsā kytsa bo ahanamy ty nyny tsimaha. Iwaze sinamybyitsa Sudeja eze tihi:

— O myzo ikia zuba tsamysapyrēnikita, Korītio ezektsa sinamy ty mytsyhyryze Pauro tuktsa bo nyny niaha. Iwatsahi sihumo abo tsimysakibazikiknaha — maha.

¹² Sinamybyitsa mysitsumuēhīnahaze sakurētsa moziknaha. Asaktsa Deus bo mosakibazikiknaha. Asahi:

— O myzo ikia zuba amysakihikynikita tsimy — mykaranaha. ¹³ Iwa tsimykaranahaze sinamybyitsa Deus pe:

— O myzo ikia zuba wasani tsimykara. Korītio ezektsa ahumo ka batu sisorek. Asahi Kiristu harere bo hyŷ mynakaranaha. Kytsa sizubarētsa mysisapywykynaha mybo kino niwatihi nyny mykaranaha iwatsahi mykurētsa tsi-mozikzonaha — mykaranaha. ¹⁴ Asa hi Deus bo ahatsyhyryze napamykysokonaha, ahahumo simypokzitsirētsa. Asahi:

— O Deus myzo tsimysapywykik. Korītio ezektsa batu sisorek mymypokzitsikinaha. Ikia sihumo tsimypokzitsiukrēta iwatsahi nimitysumuēhīkīnaha — maha.

¹⁵ Niwazuba! Deus myhumo tsimypokzitsiukrēta hỹ. Deus tse babata mybarawy bo zipēha. Atahi ipokzitsianikia waha iwatsahi mykurētsa hỹ. Katsa hi:

— O Deus myzo ikia zuba amysapyrēnikita — tsimykaranaha. Iwa tahaktsa kytsa!

10

Pauro Sesus Kiristu humo iakzohota kytsa mysipehaze pibetesaka.

¹ Uta Pauro kapehawy ahabo motsasokoro. Deus harere ty pahahyrinymyry, Kiristu wata kakubyrisorokrēta. Atakta kytsa nisihyrinymyry uta iwata pahahyrinymyry batu kasakpare my. Ikiyahatsa kasoho humo:

— O Pauro nokponi zeka mymybetsakak, ata hi mytuk tu zeka ba zikmybetsak ana pokso tsipybyrēta — tsikaha.

² Iwatahi ahabo pomo zeka ba zahabetsak. Tsipimiyikinaha zeka pahabetsak. Asaktsa kasoho tihi:

— O Pauro mybarawy ezektsa harere bo zuba yhỹ nikara, iharere ka Deus harerebara — mybarapetu nikaranaha. Pykyhytuty asa bo pomo zeka mysibetsak.

³ Mybarawy eze tu tsimyzurukunahaze mybarawy ezektsa watsa batu kasopyk hawa meky watu mytsaty mykara.

⁴ Tsinaharapesukyrykynahaze katsaktsa mybetesawytsa mybarawy ezektsa byitsa. Deus hi katsaktsa mybetesawy, mybarawy betesawytsaktsa jokbohatsa tu Deus betesawy ka, aba zuba ba zihokyknaha. Ana hi Satanas zikwy atsoko pihokdawy. Kytsa nahapepehakanahatsa metutu nipaparabaiknaha siharere atsoko pihokdawy. Deus zikwy humo mytuktu mynapykyryk, iwaze siharere atsoko pihokdawy. ⁵ Asaktsa nahapepehakanahatsa aba zubatsa nizihikiknaha — mypehawy zuba Deus soho wasani my — mybarapetu mykaranaha. Iwa kytsa mysimiywykynaha,

kytsa Deus harere bo hỹ byi mykaranaha. Katsaktsa Deus zikwy mytuk zeka siharere mohokda. Iwaze kytsa sizubarẽtsa Sesus harere bo hyỹ mykaranaha ihumo sispirikporẽtsa moziknaha. ⁶ Aty pimiwyzo zeka sinini my. Ikiahatsa Deus harere humo hyỹ tsimykaranaha ahatuk zeka estuba iharere bo hỹ habyi zeka atahi sinini my.

⁷ O kytsa wabyziutaha! Ikiahatsa mynury bo zuba iktsa ahasopyk. Aty ahape my zeka:

— Uta zuba Kiristu harere bo hyỹ mykara Pauro tuktsa ja batu kanyhỹ — my. Isoho bo mytsatzyiutaha! Katsaktsa Kiristu harere bo hyỹ tsimykaranaha iwata tsimaha. ⁸ Iwa tubabatu Deus zikpeha. Pahahyrinymyry naha humo zikpeha. Ana hi botu iktsasoko batu kasikpyby. Deus zikwatawy tahi pahatsumuẽhĩkĩ. Iwaze kapehawy humo ahapunihikrẽtsa tsimoziknaha, Sesus harere humo ahaspirikporẽtsa tsimoziknaha iwatahi zikwatawy. Ba zahabetsak. Ba zahasukatsihik ana humo hi batu katy peha. ⁹ Ikiahatsa bo piwatahakaze papeu pokso ahapybyrẽtsa batu mozihikik. ¹⁰ Aty zeka:

— O Pauro mybo zikziwatahakaze ziubaraty papeu humo ziknamybetsakak. Mytuk zeka mekta tu isopyk niy. Atahi:

“O Pauro ipunihikbyita tu iharere ba ziwabynaha. Motsasoikik hawa mybo motsaso wasani ja”. Batu amy tohi mykara tsimaha — niy. ¹¹ Atakta ana kino nitsasoko kaharere bo wabyziuty! — Ahabo tsimynakozorenahaze myharere papeu waha my. Hawa botu tsiwatahanaha atsatu motsasoko — my. Iwa hỹ.

¹² Wastuhu kytsa ahatuk:

— O katsaktsa mysapyrẽnikitsa — mykaranaha. Katsaktsa siwatsa batu tyso. Ba sihyrinymyry. Simytsatzyhybrytsa tu hawa wasani zuba mykaranaha mytsaty aha

byitsa mykaranaha. Deus okzeka batu wasani zikaha. ¹³ Tsimytsasokonaha humo pykyhytu — katsa zuba myhyrinymyrētsa — batu tyso. — Deus hi botu ahabo nimypeha iwatsahi tsipahahyrinymyrykynaha iharere bo hyĩ tsimykaranaha ana humo zuba tsimytsasokonaha — nawa mysopyk. Batu mybarapetu tsimykaranaha.

¹⁴ Katsaktsa tapara ahabo tsikzumunaha. Deus wasaniha ahabo tsiktsasokonaha. Deus hi:

— O Korītio ezektsa bo taha — niy. Deus nimypehana-hatsahi ahabo tsikzumunaha. ¹⁵ Bykyze ustsā kytsa ahabo izumunaha. Iwatsahi batu tyso:

— O katsa zuba Korītio ezektsa bo Sesus soho humo tsiksihyrinymyrykynaha — iwa ba zikaha. Ikiahatsa Sesus harere bo hyĩ tsimykaranaha ana zuba tsimyzihikiknaha. Abahi tsipinymyrytohinaha iwatuze Deus harere humo zuba hyĩ tsimykaranaha, mypehatsa harere bo zuba yhyĩ tsimaha. Ana bo mymypeha anabo hi zuba tsimykurunaha. ¹⁶ Deus wasania ty ahabo tsimytsasobanahaze nokponi tsimykurunaha. Sasabyitsa bo tsimytsasokonaha nanabyitaba sihudikhudikwy eze tsinakaranaha. Iwatsahi kytsa batu tyso:

— Pauro tuktsa tuk Deus wasaniha kytsa bo motsasokonaha. Kytsa Deus harere botu ziwabynaha, sibo hi motsasokonaha — iwa batu tyso. Anaharere humo hi batu zikaha.

¹⁷ Deus harere papeu humo ziwataha:

— Katsaktsa mysapyrētsa tsimaha zeka. Katsa kytsa pe: “O Deus myzo atahi zuba tsimysapyrēnikita iwata tahaktsa kytsa!” — tsimaha. ¹⁸ Katsaktsa mypetu mysopyk zeka:

— O myokzeka wasani tsimaha — iwa tsimykaranaha zeka batu aty tohi yhyĩ mykaranaha. Deus zuba mype zeka:

— O ikiahatsa wasani tsimykarana — my. Iwaze zuba wasani tsimaha iharere hi tisapyrēna atahi mymybete-saka niy hỹ.

11

Pauro iwaze siakzohobyitsa simyspihikbatanikitsa tuk mykara.

¹ Kyze motsasokoro ityrykmyita wata. Kaharere pykyhytu tsiwabyziunahaktsa! Kahumo ahakubyrisoroku ja.

² Deus ahahumo pahapokzitsiki nahawa tihi. Uta kino niwatihi pahapokzitsiki iwata my. Abaka ahahumo kasukatsihikrēta. Atatsa ityrykduwyhybyitatsa tuze iharerewabyhy zuba iakparawy ustsas mykyryburuktsa batu iakparawy. Atatsa watatsa ikiahatsa Kiristu zuba ahakparawy, ikiahatsa tihi:

— O Kiristu zuba mykparawy. Ustsaktsa harerewabyhytsa batu mywabyhy — tsimaha. Iwa mozihikik.
³ Ahasoho humo kasukatsihikrēta kytsa ahabo mybarapetu mykaranaha. Siharere tsiwabyziunaha zeka batu imysapy mytsaty tsimykarana. Iwatsahi Kiristu harere humo batu hỹ zikaha siharere humo tsimiywykynaha. Satanas Ewa zispihikbataka naha wa asaktsa ahabo mybarapetu mykaranaha. Siharere bo yhỹ tsimykarana zeka kasukatsihikrēta. ⁴ Aty ahabo mozumuze iharere ezytyk motsasoze ikiahatsa hi:

— O ahawaha batu mynyhy — tsimaha. Tapara Sesus babata soho ahabo tsiktsasotsasokonaha. Asaktsa batu. Sesus babata soho ahabo batu tysoho. Tapara Deus hyrikoso soho ahabo tsiktsasotsasokonaha. Asaktsa batu, Deus hyrikoso babata ahabo batu tysoho. Tapara Deus wasania ty zuba ahabo tsiktsasotsasokonaha. Asaktsa siharere bo zuba yhỹ tsimykarana, siharere humo ahakurētsa. Hawa ha ty mektsatu motsasonaha.

Deus wasania ty batu tyso. Asa hi ahabo mybarapetu mykaranaha.

⁵ Asahi ahabo mybarapetu mykaranahaze sihumo aharerewabymybarētsa tsimoziknaha. Deus zikwatawy atahi tazikwy ty kabo nyny niy pahamyiwybyiki iwatsahi kahumo ahamyharerewabyrētsa! ⁶ Utakta kaharerehokzaharēta tu hawa ha ty iktsasoko wasani my. Utakta kahyrinomyrēta hỹ iwatsahi kytsa sizubarētsa kaharere humo yhỹ mykaranaha. Tsizubarēna ahabo ty iktsasoko ana humo hi ahahyrinomyrētsa.

⁷ Ikiahatsa bo ikzumuze Deus wasania ty iktsasoko iwaze ahaokyrysaro ty kabo batu nyny tsikaha. Ahatukze kanamy tsikaeni tsibik zuba iky, iwa humo hi zikzuruku iwatahi Deus isapyrēnikia ty iharere ahabo iktsasoko. Deus wasaniha humo ihuakbara ty ikykara. Hawa wasani ikykara. Ikiahatsa kaharere humo Deus tyryktsa tsikyziknaha. ⁸ Deus wasania ty ahabo iktsasokoze ustsā Sesus tuktsa siokyrysaro ty kabo nyny nikaranaha. Sesus tuktsa ustsā hudikhudikwy ezektsa siokyrysaro ty kabo nyny nikaranaha. Ahatsyhyryze siokyrysaro iakse iwa Deus wasania ty ahabo iktsasoze iwaze ihuakbara ty iktsaso.

⁹ Utakta ahatuk zikzuruspykze batu aty tohi okyrysaro humo zikykybyikize batu ahatykda. Sesus tuktsa Masedonia ezektsa kabo izumunahaze tahanamy ty kabo nyny niaha. Ikihihik naha ty kabo nyny niaha. Ahabo batu ihuak ty ahabo tysapykyk iky ahabo kabokta batu aha. ¹⁰ Deus wasania ty Keresia ezektsa bo motsasoko. Iharere baba wasani motsasoko, Kiristu harere kakparawy iwaze batu mybarapetu kasopyk. Kahyriziktsozawu kytsa Deus wasaniha motsasoko batu pyk kasopyk, ana humo hi ihuakbara ty ikykara. Batu kytsa siokyrysaro ty kabo nyny zikaha. Niwazuba! ¹¹ Ikiahatsa hi:

— O Pauro myhumo inypokzitsiubyita tu myokyrysaro ty batu ziaксе — tsimykaranaha. Niwazuba! Deus hi tsihyrinymyrēta, utakta ahahumo kamypokzitsiarēta ana humo kino tsihyrinymyrēta hỹ.

¹² Asaktsa simysapybyitsa hi:

— O katsaktsa Pauro tuktsa watsa tsimaha — mykaranaha. Batu ba. Utakta Deus harere wasania ty ihuakbara ty motsasoko. Asaktsa batu mekywatsa tu nikananaha. Asahi ahaokyrysaro ziaксеkenaha iwatsahi batu mywa zikaha. ¹³ Asaktsa kytsa Kiristu humo sipe ahabyitsa maha. — Katsaktsa Kiristu ykzohotsa — mykaranahaze mybarapetu mykaranaha:

— O Deus wasaniha tsimytsasokonaha ana kino myhyriziktsokzawy — mykaranaha. Iwa mybarapetu mykaranaha. ¹⁴ Utakta kapetu kasopyk:

— Satanas myzihawatahakanahatsa watsa niyziknaha mysispihikbatakanaha. Hawa skaraba Korītio ezektsa siharere bo yhỹ mykaranaha — batu mykara. Nawa batu mytsaty mykara. Satanas hi karipu karipuwu wata niyzik iwaze kytsa bo mybarapetu mykara. Atahi bi-joikpe iknykta Deus tsumuēhĩtsa wata mozik. Hawaha ta sa. Kytsa bo mybarapetu mykara ana humo hi mykara. ¹⁵ Iwatsahi sitsumuēhĩtsitsa kino niwatihi nisispihikbatakanahatsa:

— Katsaktsa mymysapyrētsa — mybarapetu mykaranaha. Iwa kytsa mysispihikbatakanaha. Anasoho humo hi batu mypyby. Deus zuba mokozoko hawa isapybara ty sibo nyny my.

Pauro iakzohota Kiristu humo izuhuta nikara.

¹⁶ O kytsa ikiahatsa ba kape:

— Pauro ityrykmyita ana bo ka — mytsaty mytsaty byitaha. Ikiahatsa ahaokze ka ityrykmyita mytsaty tsimykaranaha zeka kasohe bo zuba tsipiwabynaha. Sispihikbatakanahatsa watsa — kamysapyrēta — mykara.

¹⁷ Hawa ahabo motsasokoro kaharere ty zuba motsasoko. Deus mozihikik naha humo ahabo batu motsaso hawa mozihikik naha humo zuba ahabo motsasoko, ityrykmyita tawata motsasoko. ¹⁸ Utsa kytsa botu ahape mykaranaha:

— O katsaktsa mysapyrētsa — niaha. Ana hi nitsasokonahaze sihumo ahamyharerewabyrētsa ana hi nizihikiknaha. Siwatsa uta kino niwatihi — Kamysapyrēta — my. ¹⁹ Ahape tu ahasopyk:

— Katsaktsa myhyrinymyrētsa hỹ — tsimykaranaha. Ikiahatsa sityrykmyitsa harere ahakparawy. ²⁰ Asaktsa pahakyzonahaze sihumo ahakparawy. Pahaspihikbatakanahaze sihumo ahakparawy. Ahadisahawy piaksekenahaze ahakparawy. Sihumo ahanamybyitsa tu tsinakaranaha. Pahakikinahaze sihumo ahakparawy ahaspirikpobyitsa tu tsimykaranaha. ²¹ Katsaktsa sisopyk humo mysikpybyrētsa tsimykaranaha.

Wastuhu kytsa:

— O mysapyrētsa hỹ —. Utakta iwa niwatihi — O kamysapyrēta my — ityrykmyita wata motsasoko mybarawy ezektsa soho waha natasokonaha. ²² Asa tihi:

— Katsaktsa Ebereutsa — mykaranaha. Uta kino niwatihi Ebereu tihi. — Katsaktsa Isareu ezektsa — mykaranaha. Uta kino niwatihi Isareu ezekta tihi. — Katsaktsa Abarão tsekokatsa — maha. Uta kino niwatihi Abarão tsekoka tihi my. ²³ — Katsaktsa Kiristu tsumuēhītsa — mykaranaha. Uta kino niwatihi, Kiristu harere bo hỹ mynakara ana soho motsasoko zeka katyrykmyita wata my. Kiristu humo tarabaja abazuba ikykara itsumuēhĩkĩ hỹ. Ihumo sakyriukrēnikitsa

hurukwy bo kytsa zikoktyhyryknaha. Asaktsa batu sakyriukrēnikitsa hurukwy bo batu isty okty. Kytsa zikikinaha myraratsa hwyk ty tsizererēna ty zikikinaha. Asaktsa batu skiok. Kytsa asiba zikbezenaha zikikinaha. Asaktsa batu isty ba.

²⁴ Taparaktsa Sudeutsa zikihikknaha. Mytsyhyry wa zikikinaha. Kasukpetara baze zikikinaha. Tirīta nowe zikikinaha. ²⁵ Homa ezektsa kino niwatihi zikikinaha. Harakykbyi kasukpetara baze hwi ty zikikinaha. Asaktsa siakyriukrēnikitsa harahare ezektsa ty zikarawowokonaha. Zikbeze tsihikknaha iwa nikananaha. Harakykbyi buburu zuba buruk ikukuruze tsaraha puētsikbyita niharazuk. Estubaka buburu zuba buruk unata iknatsutsuku okoroze iwa pihik eze ikapykyryk nimyra bo batu zuk.

²⁶ Nanabyitaba ziknaukuruze kytsa asiba zikbezenaha. Buburu inapokze. Sitsyhyryboarētsa kanamy ziaaksebaiknaha. Sudeutsa taparaktsa kasukyrytsitsa zikbezekyzyknaha. Sudeutsabyitsa kino niwatihi zikbezekyzyknaha. Sihudikhudikwy burukze kytsa zikbeze kzyzyknaha. Jerukbara bo niwatihi kytsa zikbezekyzyknaha. Buburu zuba bo asiba ikarazuk. Kytsa tihi:

— Katsaktsa aharereziuwu tsimaha — mybarapetu nikananaha. Sihumo asiba ikyrikosokda. ²⁷ Tarabaja tsizubarēna ikykara. Kahyritziksokzawy humo batu kaōtutsa. Kadisahawy nepykze kadisahawybyita karapa zikzykyk. Karapukrēta ikykara. Batu kasuku. Kasukbyita iwarik zikzykyk.

²⁸ Iwa sinini mynakara. Pibytuhukutu Sesus tuktsa sizubarētsa soho mytsaty mytsaty mykara. Kapetu kasopyk:

— Kytsa asahi Sesus harere bo hyŷ mykaranaha wasani ja mykaranaha — my. Sihumo kamypokzitsiarēta iwatahi mytsaty mytsaty mynakara. ²⁹ Aty Sesus harere bo hyŷ

mykara wasani baraty my zeka uta ituk kasukatsihikrēta. Batu myku tsimaha. Aty Sesus harere bo hyĥ mykara imysapybyita mykara zeka uta ituk kasukatsihikrēta. Batu myku tsimaha.

³⁰ Kytsa sizubarētsa kasoho humo sihyrinomyrētsa. Kazikwybyita sihyrinomyrētsa. Ana kino motsaso tsihikik. ³¹ Deus hi kaharere piwabykyze atahi tsihyrinomyrēta hĥ. Ikiahatsa bo batu mybarapetu my atahi tsihyrinomyrēta. Deus mymypehaka Sesus Kiristuzo. Katsaktsa ipe tsimaha:

— O Deus ikia zuba koiknybaktatu hĥ amysapyrēnikita — tsimykarana.

³² Iwaze Damasko eze tuze sipehatsa Aretas inarokota atakta zikbeze tsihikik. Iwatahi iperytsitsa Damasko hokbowy baze zikuparahakanaha katsipa humo zikokty tsihikiknaha. ³³ Katukytsa ziktsumuēhñnaha. Unata eze zikoktyhyryknaha tsahi tsoromapeza eze tu izikspikiknaha ape bo niaha. Hokbowy buruk iknasik. Iknawak. Iwaze Damasko ekze ikparakik, iwa ikwakik.

12

Pauro Deus hudikhudikwy zitsotospykyze ziny.

¹ Uta ahabo motsasokoro — kamysapyrēta my — ahape mykara. Anaharere batu imysapy iwatuze motsasoko. Mypehakatsa isapyrēnikia zikwatahawy, hinibyitatu zitsotospyk wa ha isapyrēnikia iny, ana soho ahabo motsasoko.

² Tubabatu katorise niytyk tseheze Deus hudikhudikwy bo zikoktyhyryk. Uta zikoktyhyryk ja. Zitsotospykyrykze zuba ja. Batu kanyhy. Deus zuba tsihyrinomyrēta. ³ Atsoko tasapy bo zikoktyhyryk tawa ihudikhudikwy bo iksukze tisapyrēna. Utakta zikoktyhyryk ja. Zitsotospykykze ja. Batu kanyhy. Deus zuba tsihyrinomyrēta.

⁴ Anaeze iharere tisapyrẽna iwaby. Anaharere ty kino batu tyso. Mybarawy ezeksa bo batu harere my. ⁵ Deus hi zikoktyhyryk iwatahi ustsá bo — Kamysapyrẽta — my batu tyso. Uta kino kazikwybyita tu kytsa sihyrinymyrẽtsa ana humo hi motsasokoro. Kapunihikbyita tu ana hi motsasokoro. ⁶ Utakta — kamysapyrẽta — my zeka wasani my. Batu katyrykmyita. Hawa ha ty wasania ty zuba ahabo motsasoko. Iwaze kaharere ty — kamysapyrẽta — batu tyso. Ikiahatsa kasoho humo botu ahahyrinymyrẽtsa. Hawa zikzuruku naha humo ahahyrinymyrẽtsa. Hawa motsasoko ana humo kino ahahyrinymyrẽtsa. Kasoho tyka sosobyi my, hawa sa kasoho mytsaty tsimykaránaha wasani my batu meky watu mytsaty tsimykaránaha.

⁷ Deus tahudikhudikwy bo zikoktyhyrykze isapyrẽnikia tsizubarẽna ikzinyre. Tawata iwaze Deus tapetu isopyk:

— Pauro isapyrẽnikia ty ziny. Ana humo hi tozeka ja “aba zubata ja” my — niy. Iwaze Deus ziksininiwyky. Iharere humo Satanas pikmyitsapryriwyky iwatahi kamyitsapyrẽta mozik. ⁸ Kamyitsapryrize harakykbyihi Deus pe iky:

— O Deus myzo tsikzororowykta! — iky. Deus bo ikzapykykyk. ⁹ Iwaze Deus kape niy:

— Ba zazororowy. Kazikwy ty zuba abo nyny mykara. Akubyita tuze kazikwy ty puẽtsik abo nyny mykara ahumo kamypokzitsiarẽta hỹ — niy. Iwatahi kamyitsapyrẽta my ana humo hi kakurẽta. Ustsá kytsa pe:

— Utakta kapunihikrẽta — my. Iwa ba ziky. — Kamyitsapyrẽta tuze kakurẽta. Pibyituhukutu Kiristu zikwy ty kabo nyny mynakara — my. ¹⁰ Iwa ustsá kytsa pe mykara:

— Kamyitsapyrẽta tuze kakurẽta hỹ. Kiristu pokzi kamyitsapyrẽta iwatahi kakurẽta. Iwaze kytsa kahumo myziakarakánaha, zikmyijaikiknaha, batu kanamyky,

asaktsa Sesus harere bo batu yhỹ nikaranaha zik-sukyrykynaha iwatahi sinini mykara iwatatu kakurēta. Kazikwybyita tu mypehakatsa zuba tazikwy ty kabo nyny mykara – niy.

Pauro Sesus tuktsa bo paikpa mytsaty nikara.

¹¹ Kaharere ityrykmyita wata. Ikiahatsa kahumo tsiharereziubyikinaha iwatahi pikbetesaka. Ahaokzeka utakta amy tohibyita wata. Asaktsa ahabo mybarapetu mykaranaha. Deus pehabyitsa tu mykaranaha sihumo ahakparawy asahi simyspihikbatanikitsa zuba mykaranaha. Ahaokzeka Deus pehakatsababatsa mytsaty ahabyitsa tsimykaranaha. Hawa mykaranaha utakta ni-watihi mykara.

¹² Ahatuk ikapykyrykze hawa Deus pehaha mykara atsatu ikykara. Deus zikwy katuk ziknapykyryk ana kino ziwatawy. Amy ty kytsa batu zikaha Deus zikwy humo ikykara. Siwatawyhytsa humo ikiahatsa tsipybybaiknaha. Ahatukze kakubyrisorokrēta ikykara iwa Deus harere humo wasani zahahyrinymyryky ana kino ziwatawykyry.

¹³ Deus wasania ty ustsas Sesus tuktsa, asaktsa inazuzuk-naha Deus harere bo piwabykynaha, sibo Deus pehatsa nitsasokoronahaze nisisapywykynaha ahatsa watsa bo ikykara. Asaktsa tahanamy ty sibo nyny nikaranaha. Ikiahatsa batu. Ahanamy ty kabo batu nyny aha. Iwa ikzihikik. Ana kino batu tyso – O Pauro myhumo batu iakparawy – batu tyso. Aha humo kakparawy.

¹⁴ Utakta petok baba ahabo iknakozore. Abaka asiba mokymyky ahabozo. Ikiahatsa ahaokyrysaro ty ba zikz-ihik. Ikiahatsa zuba Sesus harere bo hyỹ tsimykaranaha mozihikik, ahanamy batu mozihikik. Ikiahatsa kahyrytsa watsa. Sizotsa tahahyrytsa okyrysaro humo pikorohyk. Sihyrytsa sinamy ty tahazotsa bo batu nyny zikaha, ana

hi sizotsa batu simozihikik. Iwa hỹ. ¹⁵ Utakta pahatsumuẽhĩ tsihikik, kanamy ty ahabo nyny my zeka ana hi mozikykuwyky. Kytsa ahatsyhyryze pikbezenaha zeka yhỹ my ahahumo kamypokzitsiarẽta hỹ. Ikiyahatsa ja. Tsikaeni zuba kahumo ahakparawy.

¹⁶ Ikiyahatsa kasoho ty tsimypamykysonahaze:

— Pauro mytukze mynamy batu ziaксе iwatsatu myokyrysaro ty ihumo nepyk iwatahi mybo mybarapetu nikara, nimyspihikbataka — tsimaha.

¹⁷ Kaharereziuwytza ahabo ikcipehahik batu zahaspihikbatakanaha.

¹⁸ Kaharereze Titu ahabo zumu. Mytsy itukta niwatihi ahabo zumunaha. Asaktsa ahanamy ty batu tykse. Titu kawata, katsaktsa wasani tsimykaranaha. Katsaktsa ahahumo mysopyk tsimykaranaha hỹ.

¹⁹ Ikiyahatsa hi:

— O Pauro tuktsa asa tu tahabetesaha tsihikiknaha — tsimaha. Mytsaty ahabyitsa tsimykaranaha Deus okze ka tsimytsasokonaha. Ihumo zuba tsimybetesahakanaha. Kiristu nimywatawy ana humo hi tsimybetesahawynahaze ahatsyhyryze tsimytsasokonaha. Katsaktsa ahahumo mypokzitsirẽtsa, iwatsahi pahatsumuẽhĩ tsihikiknaha. Ahapunihikrẽtsa tsimoziknaha ana hi tsimyzihikiknaha. ²⁰ Ahasoho bo mytsaty ziknakara. Ahabo pomoze ja mekywa tu tsimykaranaha. Iwa ha bo mytsaty mykara. Ikiyahatsa kino niwatihi. Kasoho bo mytsaty tsimykaranaha, meky watu sa my. Ahabo pomoze ja tsimyarape sapybyikinaha ja. Ahazokdiharẽtsa ja. Awakytza humo ja tsipahaukanikinaha. Ahabo zuba ja mytsaty tsimynakaranaha. Tsikaharapehudizuikiknaha ja. Ahaharere wabymybarẽtsa ja. Ahaharereziubyitsa tu metutu tsimopaparakanaha ja. Batu astsa bo tu mytsaty tsimykaranaha ja. Iwa tsimykaranaha zeka pahabetsak.

Pahabetsakwynahaze ahasukatsihikrētsa tsimoziknaha. Batu ahaku.

²¹ Ahasoho bo paikpa mytsaty mynakara. Ahabo mynakozoreze ahahumo kasukatsihikrēta. Kytsa ahatuk zeka simysapybyitsa tu nikaranaha. Utsa okeza bo nisioktyhyryknaha. Wastuhu kytsa makutsa tu mynaharapekorokonaha. Utsa nisimyibakanaha. Iwa tsikykaranaha zeka ana humo hi batu ahaku. Ahamysapybyitsa tu tsimykaranaha ty moewy byizeka kasikpybyrēta mozik. Deus okze ka ahahumo kasikpybyrēta.

13

Pauro Sesus tuktsa nisisukpehe.

¹ Abaka harakykbyihi ahabo mynakozore. Aba ahabo mynakozorezo. Deus harere papeu humo ziwatahaka:

— Aty zeka usta maku soho motsasoze: “O tohi batu mysapy my” ba hỹ taha. Petoktsa zuba harakykbyihitsa ja mopamykysokonaha iwa kytsa maha zeka: “O tohikta batu mysapy my” iwaze yhỹ tsimaha — niy. Iwa Deus harere papeu humo ziwatahaka.

² Utakta botu petok baba ahabo iknakozore. Asaktsa tahamysapybara ty batu moewy iwatahi iksibetsakak. Iwa mykarazo. Ahabo mynakozorezoze asaktsa tahamysapybara ty moewy ahabyizeka mysibetsakzo, sihumo kasakaniharēta mozik. Utsa kytsa batu tysipeha niwatihi asa humo hi kasakaniharēta. ³ Utakta Kiristu harere zuba ahabo motsasokoro. Ana hi tsinymyry tsihikiknaha. Atahi ahatukze tsipunihikrēta niy, atahi zikwy ziwatawy hỹ, ana humo kino ahahyrynymyrētsa. Utakta simysapybyitsa humo mysibetsakze ikiahatsa hi:

— O anahi Kiristu harere hỹ — tsimykaranaha. ⁴ Kiristu mybarawy eze zikzurukuze tazikwy zerekik. Iwaze

kytsa zibezena haze iharapatawyhyta humo zihyri zikiknaha izikwybyita zibezena. Deus zihyri zikipowy abaka izikwyrēnikita niyzikzo iwa ispituzo my. Katsa ituktša tsimaha. Katsa kino niwatihi mybarawy ezektša batu mypunihik. Abaka Kiristu harere bo zuba hȳ tsimykarana haze Deus hyrikoso mytuk mynapykyryk. Katsa Korītio bo tsimopomonahaze izikwy humo mypunihikrētša tsimoziknaha. Ahatsyhyryze izikwy katuk mynapykyryk iwatahi tsipahatsumuēhīekiknaha. Iwa hȳ.

⁵ Ikiahatsa hi ahasoho ty mytsatzyiutahaktsa! Ahape tu ahasopyk:

— Sesus harere bo ja hȳ tsimykarana. Iharere humo ja ahaspirikporētša. Deus hyrikoso ja mytuk mynapykyryk baba — tsimykarana. Iwa ahape tu ahasopyk. Ikiahatsa Sesus Kiristu harere bo hȳ tsimaha zeka iwaze ituktša tsimoziknaha ana humo kino ahahyrinymyrētša. Iharere bo hȳ ahabyizeka Kiristu batu ahaturk ziknapykyryk.

⁶ Katsaktsa Kiristu humo myspirikporētša babatsa tsimaha zeka, iharere bo zuba pykyhytu hȳ tsimykarana ana humo kino ahahyrinymyrētša, ana hi tsimyzihikiknaha. ⁷ Ahatsyhyryze Deus bo tsimypamykysokonaha. Katsahi:

— O Deus myzo Korītio ezektša tysitsumuēhīkta! Simysapybyitsa nikarana anahi pimoewynaha iwa tysitsumuēhīkta! — tsimaha. Ikiahatsa wasani tsimyzurukunaha ana hi mozihikik. Ustsä kytsa tihi:

— O Pauro tuktsa Korītio ezektša nisihyrinymyryziukunaha iwatsahi siharere humo simysapyrētša moziknaha — maha. Ana harere kino ba zikzihikik. Ustsä kytsa tihi:

— O Pauro tuktsa Korītio ezektša nisimykina — maha. Ana harere kino batu waby iky. ⁸ Deus harere ba hawa tohi zikzuknaha. Ana harere

bo hỹ tsimykarana i waze ustsā kytsā bo tsimysitsumuēhīnaha zikaha, hawa wasani mykara ana ty kino hỹ mykaranaha tsimysitsumuēhīnaha.

⁹ Iwaze katsaktsa mypunihikbyize wasani tsimykarana. Iwaze ikiahatsa ahapunihikrētsa zeka mykurētsa tsimoziknaha. Iwaze ahatsyhyryze Deus bo tsimypamykysokonaha:

— O Deus myzo Korītio ezektsa tsysitsumuēhīkta! Azikwy situk mynapykyryk iwatsahi tahamysapybara humo nimyzihikbyrinaha abaka simysapyrētsa babatsa moziknaha awatahaktsa — tsimaha. ¹⁰ Aba ahabo piwataha, papeu ty kaharaze pohyryktykta. Iwaze ahabo pomoze ba pahabetsakzo. Ahahumo batu kasakani Deus zikwy katuk mynapykyryk iwaze pahatsumuēhī ana hi mozihihik. Deus hyrikoso bo yh̃ tsimaha ana hi mozihihik. Atahi batu zaha my. Uta kino niwatihi. Ba pahabetsakzo iwatahi papeu ahabo ziskyryk. Hawa taeze ahabo pomo. Iwa h̃.

¹¹ O katukytsa kawatahaha ahabo asiba nepyk. Ahamysapyrētsa tynakaranahaktsa kytsa! Kaharere bo wabyziutaha. Tyharape pokzitsikinahaktsa! Sesus tuktsa atsawatu mytsaty tsimykarana. Ikiahatsa tuk yh̃ tsimykarana. Iwaze Deus ahahumo tsimypokzitsiarēta, atahi pahahyrinymyryky ihumo ahakurētsa tsimoziknaha. Deus ahatuk tawahi mynapykyryk h̃.

¹² Tynaharape hapyrykyknahaktsa iwa ustsā pe hawa taharapepokzitsikinaha tsimymywatawynaha. Asaktsa Sesus humo sispirikporētsa katuk hi:

— O Korītio ezektsa humo myhyrizikbarētsa — mykaranaha.

¹³⁻¹⁴ Ahatsyhyryze Deus bo mopamykyso:

— O mypehakatsa Sesus Kiristu Korĩtio ezeaksa tysis-
apywyky. O Deus myzo sihumo tysipokzitsiukta! O Deus
hyrikoso situk tawahi mynapykyrykta! — my. Niwazuba.
Pauro niy

Deus Harere Aibaky Sesus mymyspirikpoko naha New Testament in Rikbaktsa (BR:rkb:Rikbaktsa)

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Rikbaktsa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30
